

ՄԱՏԵՆԱԳԱՐ "ՄԱՍԻՍ", ԲԻՒ 32

ՕՆԻԿ ՄԻՒԹԱՐԵԱՆ

# Ա Բ Օ Ր Ե Ա Յ Յ

(ՊԱՏՄՈՒԱԾՔ)

1040



PRINTED IN BULGARIA

1937

ՏԵՂՄԱՆԻԹԻՒՆ ՄԱՍԻՍ  
ԱՊԵՐԵԱ

891.99

Ա-79

89-99  
15-79

12.11.

06 FEB 2009  
EROS JUN  
6 NOV 2011  
6

9P.

ՄԱՏԵՆԱՇԱՐ “ՄԱՍԻՍ”, ԹԻՒ 32

ՕՆՆԻԿ ՄԻՒԹԱՐԵԱՆ

# Ա Պ Օ Բ Ե Ա Յ

(ՊԱՏՄՈՒԱԾ Ք)



ՄԱՍԻՍ  
ԱՐԵՎԱԿԱՆ  
ՀԱՅՈՒԹՅՈՒՆ

PRINTED IN BULGARIA

1937  
Տպագրութեան ՄԱՍԻՍ  
ՍՈՅԱԲԱ

# Ա Ռ Օ Ր Ե Ա Յ

---

Երկար տարիներու մտքի մշակ և այժմ տարագիր,  
բայց կնոջ ու երախայի մը տէր Սողոմոն Ներկարարեան։  
այդ գիշերը հազիւ երկու ժամ քնացած, գէշ երազէ մը  
լսթանուած՝ արթնցաւ։

Նիհար ու երկար ոտքերը՝ երազին մէջ տեսած ցեխե-  
րուն մէջ դեռ խրուած կարծելով՝ մէկ քանի անգամ իրար  
խառնեց և մեծղի քթի, ցից կզակի ու կճատ մօրուքի մի-  
ացեալ ճիպերով ետ հրեց վերմակը, որ ոռւսական հանրա-  
ծանօթ բորչի բոլոր զգլխիչ բոյրերը կը պահէր իր ձալքե-  
րուն մէջ։

Գոհ որ այլեւս արթուն է, հետեւաբար ծանօթ թշնա-  
միներէ իր կրնկոխ հալածուիլը սոսկ երազ՝ Սողոմոն մեծ  
գոհունակութեամբ լայնկեկ բերանը բացաւ, երկարօրէն յօ-  
րանջեց, իր կամքէն անկախ ծանր ու բազմազաղակ հոգւոց  
մը արձակեց և, իբրև լուրջ ու խորունկ մտածումի նշան  
մէկ աչքը փակելով՝ վճռեց վեր կենալ հագուիլ։

Միեւնոյն էր, ասկէ ետք ալ պիտի չկրնար քնանալ,  
մինչդեռ հազար ու հազար յոյսեր կապած էր լուսցող օր-  
ուան հետ։

- 1.— Կիսատ ձգուած նամակը գրել վերջացնել։
- 2.— Երախան լողացնել։
- 3.— Տկար կնոջ համար կարմիր Խաչի բժիշկին դի-  
մել։



4.— Նոր սենեակ գտնելու մասին մտածել, որովհետև  
պարզ էր որ այդ «խելազարը», տանտիկինը, իր սպառնա-  
լիքը պիտի գործադրէր, սենեակի վարձքը ամսու սկիզբէն  
պիտի ուզէր, մինչդեռ...

Խորհելով այսպէս, Սողոմոն արդէն, աննկատելիօրէն,  
վար սահած էր տախտակեայ մահճակալէն և, բռպիկ ոտքե-  
րու ծայրերուն վրայ, մութին մէջ խարիսխելով, ամենայն  
զգուշութեամբ ճիշտ կ'ընէր մօտենալու սեղանին ու հոն ար-  
թուն ժամացոյցին՝ ստուգելու համար թէ ժամը քանին է,  
իսկապէս:

Սեղանին հասած չհասած, բախեցաւ աթոռի մը, ո-  
րուն օրօրուիլը բնազգօրէն կուահելով, փորձեց բռնել և ան-  
կռւմէ փրկել զայն, մինչդեռ նոյն ակնթարթին հակափորը  
փորձութիւնն ունեցաւ ընդհարուելու երերուն սեղանին,  
որ կարձատեւ գիմադրութենէ մը ետք յուսահատօրէն գե-  
տին տապալուեցաւ իր ամբողջ բեռ ու բովանդակութեամբ:

Գիշերուան կէսին պայմանակ չէր, որպէսզի ընդուսա չարթննար  
կինը անկողնին մէջ և օրօրոցէն չչար երախան։ Աջէն  
պատկից զոյտ մը սենեակներուն մէջ խռովքու ու հարցա-  
կան իրարանցումներ արձագանգուեցան։ Վերէն յատակը  
դոփեցին, իսկ վարէն ծեծեցին առաստաղը։ Տան բակին  
մէջ չնիկը աղիղորմ ճիշեր արձակեց, իսկ Փփողոցին մէջ  
սուլեցին սուր ու երկարատեւ։

— Ո՞վ է, ի՞նչ կայ, ի՞նչ ըրիր, ի՞նչո՞ւ ըրիր...

Հարցումներու ամբողջ տարափ մը տեղաց կինը, և  
մինչդեռ Սողոմոն պահ մը լուս, արձան կարած կեցած էր  
մատներու ծայրերուն վրայ, երախան կը շարունակէր ճը-  
ւալ մութին մէջ ու կը թուէր պատասխանել մօր անհան-  
գիստ հարցերուն։

— Ըն-եա՛, ըն-եա՛...

— Յիսուս, Քրիստոս, Սողի՛կ, դո՞ւն ես, դուն չե՞ս,  
ո՞վ է, Սողի՛կ, շարունակեց կանչել կինը անհանգիստ ու  
լրջօրէն վախցած։

Սողոմոն վերջապէս լեզու առաւ, առանց սակայն ետ

կամ առաջ ոտք փոխելու, վախնալով որ ամէն մէկ քայլա-  
փոխին առնուազն սեղան մը պիտի տապալէ...

— Ե'ս եմ, Նունիկ, ե'ս էի, բան չեղաւ, լուցկի մը  
չաւնի՞ս քովդ, կարծեմ յիմար սեղանը բան եղաւ, վառի՛ր,  
ջանիկս, տեսնենք ինչ եղաւ...

Կինը թեթե մը հանդարառութիւն զգաց, Փա՛ռք Աս-  
տուծոյ, Սողոմոնն էր: Բարձը վեր վար ըրաւ ու վերջա-  
պէս լուցկին գտաւ ու վառեց:

Լուցկիի լոյսին հետ Սողոմոն ինքզինքն ու ելեկարա-  
կան կոճակը գտաւ և ահա լո՛յս...

Կինը աւելի շուտ բերանը բացաւ.

— Մեղա՛յ Աստծու, այս ի՞նչ ես ըսեր...

— Աղէ՛տ, կատարեա՛լ աղէտ, յանցաւոր ձայնով մըր-  
մնջեց Սողոմոն։

Արդարե՛ւ աղէտ։

Սեղանը, իրմէ անբաժան սփոսցը ոտքերուն փաթ-  
թած վիրաւոր ինկած էր, զոյտ մը ոտքեր զո՞նի պէս վեր  
տնկած։ Լառուս բառարանը, գրկախառնուած կոմունիսա-  
կան Մանիքիսին հետ, նետուած էր պնակ մը ջրալի լու-  
րիայի մէջ, որ երէկ երեկոյեան ընթրիքէն անտեսուած էր  
այս օրուան նախաճաշի համար։ Անաւարտ նամակ մը կը  
լողար անքնութեան դէմ գործածելի մուգ ու արնագոյն  
նեղուկ դեղի մը մէջ, որու սրուակին մանրիկ փշրանքները  
սենեակին ամէն ուղղութեամբ թռած էին։ «Սենեակ-տան»  
մէջ գոյութիւն ունեցող ընդամէնը երեք բաժակներէն մի-  
այն մէկը պահած էր իր նախկին գիմագիծը։ մնացեալնե-  
րու փշրանքները առայժմ չէին երեւար, Սողոմոնի կաղա-  
մարը գացեր գտեր էր երախայի համար զնուած կաթէ,  
մուգ կապոյտի վերածելով անոր անարտա սպիտակութիւ-  
նը, և տակաւին անհաշիւ բիծեր նետած էր աթոռի մէջքին  
ու նստասեղիին հանգչող ու կախուող կանացի և մանկա-  
կան զգեստներուն վրայ, Լամպը, զոր կը վառէին երբեմն,  
խնայողական իրապաշտ մզումներէ գրդուած՝ հիմա ինքզին-  
քը չարդելէ ետք, իր բովանդակութիւնը խառնած էր Սո-

ղոմոնի ծխախոտին ու յատակին վրայ փոքրիկ լճակներ  
կազմած էր...

Գիրքերու, շիշերու, պնակներու, ձեռագիրներու, հե-  
ղուկներու, նամակներու և կերակուրի մնացորդներու այդ  
աղէտ ու աւերին մէջ միակ բացական ժամացոյցն էր, ա-  
ղէտի միակ պատասխանատուն, ըստ Սողոմոնի:

— Ակնո՞ց ուր է... սոսկումով մրթմրթաց Սողոմոն  
ու հայեցքը ինկաւ նունիկի վրայ, որ մահակալէն կիսով  
չափ վար կախուած, կենդանի սարսափով տեսարանը կը դի-  
տէր և, մտովի, մէկիկ մէկիկ կը հաշուէր աղէտին կանխիկ  
և ապառիկ վնասները:

Սողոմոն, անմիթար ձայնով, փորձեց միխթարել  
կինը.

— Ոչի՞նչ, նունիկ, ոչի՞նչ, լաւ որ մելանը սփոսցին  
վրայ թափած չէ, այլապէս տանտիկնոջ ձեռքէն հոգի պիտի  
չազատէինք. այդ խելագարը անպայման նո՞րը առնել կու-  
տար...

Սողոմոնի միխթարութիւնը պդտիկ չէր և նունիկ պահ  
մը կը լուէր ու կը զբաղուէր երախայով, որ բախտին ձըգ-  
ուած՝ աւելի ու աւելի ուժգին կը ճչար.

— Բն-եա՛, ըն-եա՛...

Կայարանի ժամացոյցը, ի մեծ զարմանս Սողոմոնի,  
չորս անգամ զարկաւ:

— Մի՞թէ...

Մրմիջեց Սողոմոն ու դարձաւ անհանգիստ կնոջ, որ  
լացող երախային հետ ուղղակի պայքարի մտած էր:

— Ոչի՞նչ, նունիկ... Աւելի լաւ է ծիծ ձգես բերանը.  
անպայման լացը կը կտրէ, կը քնանայ, այլապէս հարեւան  
փրոքէսէօրը կ'արթննայ, լաւ չէ, անցեալ օրուան պէս նը-  
կատողութիւն կ'ընէ: Իսկ այս բոլորը ես կը հաւաքեմ:  
Դուն բնա՛ւ հոգ մի ըներ...

Արդարեւ, երբ լուսցաւ, Սողոմոն կրցած էր սեղանին  
վրայ և սենեակին մէջ նախկին կարգը վերականգնել մօտա-  
ւորապէս:

Հիմա օրը կը սկսէր և Սողոմոն պէտք էր գործի լըծ-  
ուէր:

Անաւարտ նամակը յետո՞յ պիտի գրէր, մինչև ճաշը  
ահագի՞ն ժամանակ ունէր: Ճաշէն եաք ալ պիտի գրէր վա-  
ղուց ծրագրած բայց չսկսած յօդուածը՝ «Հայկական Մօակոյ-  
րի Աւանդները եւ Գրական նոր Սերունդը», արդէն վճռուած  
խորագրով: Ընթերցանութիւնն ալ վե՛րջը, ընթրիքէն ա-  
ռաջ կամ յետոյ, ասիկա այնքան ալ կարեւոր չէր:

Իսկ հիմա պէտք էր անցնիլ անհրաժեշտին և անյե-  
տաձգելիին:

— Զգո՞յշ, Սողի՞կ, կը կանչէր պառկած տեղէն նու-  
նիկ, աղըն ու մոխիրը տանտիկնոջ հաւնոցին առջև չթա-  
փես նորէն և կեղաը ոտքերուդ առած սենեակը չըերես...

— Գեղեցի՞կ:

Սողոմոն սենեակը կը վերադառնար տռանց տանտիկ-  
նոջ հետ որեւէ միջադէպի և բոլորովին մաքուր կօշիկնե-  
րով:

— Հիմա վառարա՞նը վառեմ թէ վագեմ կաթի, նու-  
նի՞կ:

— Կաթի՛, կաթի... Սուրիկս անօթի է...

Ու Սողոմոն կը վագէր կաթի: Կը վերադառնար: Ի՞նչ  
մոռացկոտ դարձեր էր վերջերս: Ու կրկին կը վագէր, այս  
անգամ հաւկիթի և գետնախնձորի համար: Նունիկ հիւանդ  
էր. գէթ առաւօտները հաւկիթ մը կլւէր. գետնախնձորը  
լի ու լի կը բաւէր իրեն:

— Զգո՞յշ, այդ վառարանը պիտի ծխայ, ըստ սովո-  
րութեան:

— Ոչի՞նչ:

Թող նունիկ չանհանգստանար: Սողոմոն հնարը գտած  
էր: Վառելէ առաջ, խողովակին մէջ թերթ մը թուղթ կը  
վագէր, հաւաքուած մուրը դէպի ծխնելոյզը կը վագէր իսո-  
կոյն և այն ատեն հրաշալիօրէն, առա՞նց ծխալու՝ պիտի  
վառուէր:

— Ճաշին ի՞նչ պիտի ուտենք:

— Լուրիան ամէնէն աղէկն է, նունի'կ, թէ՛ սննդառար է և թէ՛...

Եւ առանց այլեւայլի Սողոմոն կը վազէր «Նորին Մեծութեան» մօտ լուրիա բերելու։ Միա՛կ խանութը, որ դիւթուած Սողոմոնի անհաշիւ առատաձեռնութենէն, բարեհաճած էր ապառիկ ապրանք ծախել...

Հիւսիսային երկրի աշնանային արեւը խոշոր հաւկիթի մը դեղնուցի պատրանքով մայր մտած էր, և մշուշը խաւար կապած թանձրացած էր դուրսը, երբ Սողոմոն, օրուան անյետաձելի գործերու մէկ խոշոր մասը վաղուան յետաձելով, ծուլանալու իրաւունք կու տար իրեն, լոյսը քառէր, մէկ ձեռքով երախան կ'օրօրէր, իսկ միւս ձեռքով արտասահմանեան հայերէն օրաթերթ մը բռնած՝ կը խորասուզուէր ողբերգու խմբագրականի մը ընթերցումին մէջ...

## 2.

Շաբաթը եկաւ լրացաւ և Սողոմոն վերջապէս լայն շունչ մը առաւ, երբ կիսատ ձգուած նամակը աւարտեց ու «Նորին Մեծութեան» խանութէն ապառիկ նամակագրոշմ վերցնելով՝ նամակատուփը ձգեց, յուսալով որ նամակը երեք օրէն կը հասնի իր հասցէին ու, ամէնէն ուշը մէկ շաբաթէն կը հասնի իր հասցէին ու, ամէնէն ուշը մէկ շաբաթէն, պատասխանը կը ստանայ: Թէև ճնշուած սրտով, բայց կատարելապէս յուսալից, Սողոմոն այդ նամակով քիչ մը փոխ դրամ կը խնդրէր իր հինաւուրց մէկ ընկերէն, որ հիմա դիրքի ու դրամի տէր էր օտար առեւտրական հիմնարկութեան մը մէջ:

— Դուն հոգ մի՛ ըներ, նունիկ, նամակն ստանալուն պէս Գրիշան մէկ երկու չ'ըներ, դրամ կը դրէկ: Դուն Գրիշան չես ճանչնար, ոսկի տղայ է, և վերջապէս կատակ չէ, փութերով աղ կերած ենք միասին:

Նունիկ թերահաւատ էր:

— Է՛ն, քու ոսկի աղաներդ իրենց կերած փութ մը

աղերով, կ'ըսէր ու չոր հազով մը կը տառապէր: Ու կը յարէր:

— Ոսկի աղանհրէդ մէկն ալ Պարիկեանը չէ՞ր, վերջին դրամդ կերաւ և տակաւին հոս հոն բերանը աղտոտեց թէ իր դրամով կնոջդ համար վերարկու գնած է...

— Պարիկեանը ուրի՛շ, նո՛ւնիկ...

— Իսկ այն մի՞ւսը, որ պաշտօնդ ձեռք ձգելու համար հոգին ծախեց: Իսկ Սափրիչեա՞նը, որ մութ գաղտասուքներ տարածեց աղ ու ձախ և, տակաւին անբաւական, հակառակորդ թերթերուն մէջ կեղծ անուան տակ անունդ վարկաբեկել ուղեց... Իսկ դպրոցական գրասեղանի ընկեր Մարկոսեա՞նը, որ հիմա չի զիջանիր բարեւդ անդամ առնելու, վախնալով թէ փոխ դրամ պիտի խնդրես...

Սողոմոնին բոլորովին հաճելի չէր նունիկի այս թուումըն մասանցը, որուն կը ձեռնարկէր ան ամէն անզամ, երբ Սողոմոնի լաւատեսութեամբ խայտացող հոգին փորձէր հազրդական զամնալ:

Բայց Սողոմոն չէր ալ հակածառեր, որպէսզի չգրգոէ նունիկի առանց այն ալ հիւանդ ջիղերը:

Ոչինչ: Խօսակցութիւնը միշտ գիւրին էր փոխել:

— Սուրիկը շատ լաւ քնացաւ այսօր, այնպէս չէ...

Է՛ն, նունիկ ի՞նչ գիտնար: Նունիկ գիտէր միայն, որ երախան ձեռքէ կ'երթայ, երկու օր է որ կերածը ետ կու տայ...

— Ոչի՞նչ: Վաղը բժիշկ կը կանչեմ, վճռականօրէն կը յուսաղրէր Սողոմոն, ու մինչ նունիկ թերահաւատօրէն գլուխը կ'օրօրէր, Սողոմոն թղթի պատառիկի մը վրայ գըժուարին հաշիւներ կ'ընէր ստուգելու, թէ մինչեւ ամսութ վերջը «Նորին Մեծութեան» իր ունեցած պարտքը քանիի՞ կը բնար հասնիլ, մօտաւորապէս...

— Պա՛հ... 500 ֆրանք...

Իր կամքէն անկախ կը բացագանչէր Սողոմոն և իսկոյն կ'ուրախանար, որ նունիկ Սուրիկով զբաղուած ըլլալով չէր լսած զինքը, չէր հետաքրքրուած և հետեւաբար չէր գիտեր իրական վտանգի մասին:

— Այսօր անցաւ, ոչի՞նչ, կը մտածէր Սողոմոն, վաղը պէտք է գործի լծուիլ. նստիլ և այլեւս վեր չկենալ. ծրագրուած յօդուածը սկսի՛լ վերջապէս: Յօդուած մը ընդարձակ ու բազմարովանդակ, որ գէթ հինգ հարիւր ֆրանք վարձատրութիւն բերէր:

Յաջորդ օրը սովորական օրերէն մէկը կ'ըլլար, սակայն: Աւելի գէշը: Տանտիկնոջ հետ անհաճոյ խօսակցութիւն մը կը թունաւորէր ամբողջ օրը: Անձրեւն ալ դադրելիք չունէր բնաւ ու հին յօդացաւը ինքինքը կը չեշտէր: ծունկերը կը կրկտէր: Ուրիշ անգամ գէթ կրնար տնական երեք չվերջացող գործերէն քիչ մը աչք բանալ, ժամ մը երկու գողնալ և եթէ ոչ գրել, այլ գոնէ ամփոփութիւն ու մըտածել գրուելիք ոեւէ նիւթի շուրջ: Իսկ այսօր, չնայած որ կայարանի թշուառական ժամացոյցը կէս զիշերը կ'ազդարարէր, Սողոմոն կրկին հարկադրուած էր ամբողջ օրը ձայնը չկտրած Սուրբկն օրօրել վերստին.

— Բա՛ա՛ա՛յ, բայ բա՛յ...

Ու միակ մխիթարութիւնն այն էր, որ վաղը, առաւոտը, բժիշկը իր խոստումը անշուշտ պիտի կատարէր, այժեկէր Սուրբկին, քննէր նունիկի թոքերը և Աստուծով ոչինչ պիտի գտնէր, հստեւաբար, ճաշէն ետք, կամ թերեւս ճաշէն առաջ, ինք կը նստի յօդուածը սկսելու:

— Բա՛ա՛ա՛յ, բայ բա՛յ... թո՛ղ որ մամադ քնանայ քիչ մը, անպիտա՞ն...

— Թո՛ղ, թո՛ղ ես օրօրեմ, զուն գնա քիչ մը քնացիր, ամբողջ օրը ոտքի վրայ ես, կը կարեկցէր նունիկ:

Սողոմոն կը փշաքաղուէր, կը յուզուէր:

Ա՛իս, նունիկ որքա՞ն կը սիրէր զինքը:

— Ոչի՞նչ, նունիկ, ոչի՞նչ, զուն գեռ քնացիր, երբեք չքնացար, ինձ համար այսպէս շատ լաւ է: արդէն քունս չի տանիր...

Աստուան դէմ նունիկ մեծ ճիզերով հազիւ կ'արթընցնէր Սողոմոնը, որ նստած տեղը, աթոռին վրայ, կղակն ու մօրուքը կուրծքին սեղմած, կը քնանար Սուրբկի օրօրցին և նունիկի մահճակալին մէջտեղ:

— Այդ օրու «յիմար ծերուկը» չեկաւ, կրկին իր գանգատը կը ձգէր նունիկ:

— «Յիմար ծերուկը», ոչի՞նչ, ուր որ է կու գայ, տակաւին ժամը տասներկուսը չկայ, լիայոյս կը հնչէր Սողոմոն, թէս աչքերէն արցունք կը հոսէր և կծու սոխը ոչ մէկ կերպով կրնար ջարդել բութ դանակով:

Մինչև ժամը երկուքը, բակի շան ամէն հաջոցին, Սողոմոն ներս ու դուրս ըրաւ «յիմար ծերուկը» — բժիշկը — ընդունելու բոլոր պատշաճ պատրաստութիւններով, բայց բժիշկը չեկաւ...

Ստիպուած՝ ինքը գնաց կանչելու: Կէս ճամբան քիչ մնաց ետ դառնար, օրովհետեւ:

— Անյարմար չէր արդեօք բարի, ծերունի բժիշկ մը իր տունէն հանել ու կէս ժամ հետիստն քալեցնել, երկու հիւանդ մէկէն քննել տալ և այն ալ առանց վարձատրութեան... ի՞նչ ընենք որ կարմիր նաշի բժիշկ է և հայասէր: Աստուած իմ, գէթ կառք մը վարձելու չափ դրամ ունենայի, զոնէ ելեկարաքարշով կարենայի հիւրասիրել...

Բայց նորէն շարունակեց քալել:

— Ոչի՞նչ, ի՞նչ կրնամ ընել խորհեցաւ տառապագին, որ զրամ չունիմ ի՞նչ կրնամ ընել...

Ու աւաղեց:

— էշի՛ պէս երէկ ու առջի օր ծուլացայ, անձրեւ է ըսի, և փոխանակ ծխախոտը «Նորին Մեծութենէն» ապառիկ վերցնելու, կանիսիկ դրամով զնեցի, Այդպէս չընէի՛ հիմա փրկուած կ'ըլլայի...

Բժիշկը տունը չէր:

— Կրնայ գալ, կրնայ չգալ, ես ի՞նչ գիտնամ, միւս սիւ:

Ծիծաղը հազիւ զսպելով կը խօսէր մեծանիստ կին մը, որուն ով ըլլալը Սողոմոն չկրցաւ գուշակել:

— Այս «Ահաւորը» տեսնես յիմար ծերուկին կի՞նն է թէ սպասուհին, կը խորհէր չարունակ Սողոմոն ու կը սպասէր, ժամ մը, երկու ժամ, մինչև որ «Ահաւորը» վերջին

— Գիտե՞ս, Նո՛ւնիկ, գուցէ այսօր մէկ շունչով գրեմ վերջացնեմ, կը ցնծար Սողոմոն ու պարծանքով կը վերջիշէր հին օրերը, երբ, պատահած էր, օրը տասներկու ժամ նստիլ և ամիսներու աշխատանքը չարթուան մը մէջ աւարտել:

— Կրնա՞ս երեւակայել, Նունիկ, իմ «Փաղավարի եւ Նիւրի Նուանումը» գրած եմ ամիս ու կէսուան ընթացքին միայն, բայց հինդ հարիւր էջ է, է՛, կատակ չէ...

Ճաշէն ետք, ընթրիքէն առաջ, ընթրիքէն ետք, մինչև կէս գիշեր, Սողոմոնի գրիչը կը յամառէր, կը կենար և նախկին երեք էջերուն վրայ զէթ կէս մըն ալ չէր աւելցներ...

— Է՛ս, արդէն այդ երեք էջերն ալ բան մը չարժեն, կը խորէր Սողոմոն, տեսակ մը միթարութեամբ, Աւելի շուա ճառ է և բանաստեղծութիւն, քան լուրջ, բովանդակալից յօդուած:

— Տարագրութեան մէջ մարդ ակամայ բանաստեղծ կը դառնայ, կը մտածէր Սողոմոն:

Երկու շաբաթ եւս, և վերջապէս յօդուածը պատրաստ էր, Ճիշտ է, Սողոմոնի սրտովը չէր, ոչ ալ անոր սրոշ կամ թաքուն կարողութիւններու բնորոշ արտայայտութիւնն էր, բայց, ի՞նչ ըրած, ժամանակ չկար, պէտք էր ստորագրել և դրկել, 500 ֆրանքը ուղղակի փրկութիւն էր...

Յօդուածը ճամբար ինկաւ, իր տեղը հասաւ, տպուեցաւ, վերադարձաւ, հեղինակին կողմէ հաճոյքով կարդացուեցաւ, բայց ընկալուածը, վարձատրութիւն բերող ապահովացուած նամակը, կապոյտ թունի մը պէս միայն Սողոմոնի երազներուն մէջ իր խատուտիկ թեւերը բացաւ:

Ի գո՞ւր Սողոմոն յաճախ բան գործ թողած, օրը երկու անգամ ուղղակի հալածեց նամակատան ցրուիչը՝ փողոցէ փողոց և, արոփուն սրտով, վայրկեանէ վայրկեան, ապահովագրուած նամակին սպասեց:

Օրեր ետք ան լրջօրէն կը կասկածէր ու անվարան, իր կասկածները կը յայտնէր Նունիկին:

— Չե՞ս կարծեր, սիրելիս, որ ապահովագրուած նա-

մակը կորսուած ըլլայ: Կամ, ո՞վ գիտէ, այդ անպիտան ցրուիչը կասկածոտ, վախկոտ հայեացք ունի վերջերս. չե՞ս կարծեր որ նամակը բացած, 500 ֆրանքի չէքը մէջէն կորցած ըլլայ...

Նունիկ դառնօրէն կը քրքջար.

— Օ՛, աստուածայի՞ն միամտութիւն:

Յաջորդ օրը Սողոմոն ցրուիչին առաջքը կտրեց, նախքան մեծ հրապարակը կը մտնէր.

Փոքրիկ հազ մը. ծանօթ, անհանգիստ դողեր և խեղդուկ ձայնով

— Յարգանքներս: Խնդրեմ: Նամակ ունի՞մ:

Ճերմակ պահարանով նամակ, նեղ ու երկարաւուն, ծանօթ ձեռագիր, բայց պարզ և սովորական:

Ամէն պարագայի տակ լաւ էր, որեւէ անակնկալ, նորութիւն...

Սողոմոնի ընդարձակ, գեղեցիկ յօդուածը արդէն տըպած են մեծ հաճոյքով, իսկ ընթերցողները կարգացած են զայն յափշտակութեամբ: Կը չնորհաւորեն: Ճնորհակալ են, որ Սողոմոն կը շարունակէ իր թանկագին աշխատակցութիւնը: Բայց ցաւ ի սիրտ ստիպուած են յայտնել. թէ թերթը վերջերս դրամական ճգնաժամ կ'ապրի, անյիտագելիք պարտքերու տակ է, ուստի հարկադրուած են ժամանակաւրապէս չվարձատրել ոչ ոքի, անխիտր: Յոյս ունին, որ Սողոմոն լաւ է և հանգիստ և յետ այսու աւելի՛ յաձախ պիտի գրէ թերթին, որ ի՛ւն ալ է:

Նամակը կարգաց երկրորդ, երրորդ անգամ: Տողերը իրար կը խառնուէին: որոշ բառեր խորհրդաւոր, բացառիկ իմաստ կ'ընդունէին: Տիեզծ ու չնչին յօյսեր՝ հազիւ մարմին առած՝ կը մեռնէին: Ո՛չ Ամէն բան պարզ էր: Նոյն իսկ այդ ժպառուն ապագայով ընդգծուած ժամանակաւրապէսը անիծեալ վկայ մըն էր, թէ վարձատրութիւն պիտի չստանայ...

Առաջին անգամ ըլլալով Նունիկէն պահեց նամակն ու անոր աղեխարչ բովանդակութիւնը...

— Այդ սպասուած 500 ֆրանքէն բան մը չե՞ս կրնար տ գնել. Սուրբիկին լաթ մաթ առնենք, երախան փոխոր չունի, հարցուց նունիկ:

— Ինչո՞ւ չէ, կարելի է, ստեց Սողոմոն և ինքնիրմէ ամչցած, վախցած, սենեակէն ուղղակի դուրս փախաւ:

Օրեր ետք վարդագոյն լաւատեսութիւն մը կը խտաէր Սողոմոնի հոգին: Ինչո՞ւ չկարծել, թէ այսօր կամ վաղը Գըրիշյէն խնդրած փոխզրայը պիտի ստանար: Ճի՞շտ է, արդէն շաբաթներ անցած էին և զրկողը արդէն կը զրկէր, ինչպէս կ'ըսէր նունիկ, բայց, ի՞նչ պայման է այդ: Զէ՞ս որ խեղճ Գրիշան զբաղուած մարդ է հիմա և առեւտրականգրասենեկային մաշող հնանուքի մէջ գլուխ քերելու ժամանակ չունի...

Ու տակաւ աճող այդ լաւատեսութեան հաճելի հովերով տարուած՝ Սողոմոն արեւոտ օր մը գրկեց նունիկի թըխահեր, սիրուն, գեղեցիկ գլուխը և խոստովանեցաւ.

— Գիտե՞ս, ըսածդ եղաւ, խմբագրութիւնը ժամանակաւորապէս հնարաւորութիւն չունի վարձատրելու, այնպէս որ հինգ հարիւր ֆրանքը... ժամանակաւորապէս...

Զարմանալի՛ բան: Նունիկ կարծես վաղուց զիտէր այդ մասին. այլապէս ինչո՞ւ չզարմացաւ,

— Է՞հ, այլեւս ոչ մէկ բան կը զարմացնէ զիս, նոյն իսկ քու զարմանալի լաւատեսութիւնը իր բոլոր ժամանակաւորապէսներով բնա՛ւ զարմանալի չէ, տիրորէն պատասխանեց նունիկ, հայեացքը Սողոմոնի կօշիկի ծումուած, ողբալի ծայրերուն յառած...

Ամէն պարագայի Սողոմոն հեշտութեամբ զինաթափուսդներէն չէր: Ան հիմա թէկ մեծ յոյս դրած Գրիշային վրայ, օր գիշեր կ'ընէր խորհելով թէ հայկական ուրիշ ո՞ր թերթը ի վիճակի էր վարձատրելու իր աշխատակցութիւնը: Որովհետեւ անկարելի էր, որ գարաւոր մշակոյթի, հարուստ գրականութեան և այնքան առատ թերթերու տէր մեր ժողովուրդը չկրնար մտքի մշակի մը գրական աշխատանքը ամենագոյզն չափով գոնէ վարձատրել... ի հարկէ:

Նունիկի հետ խորհրդակցիւը այդ մասին անօդուտ էր:

Նունիկ հին յոռետես էր. կասկածամտութիւնը պարզապէս բնաւորութիւն դարձած էր անոր մօտ: Մինչդեռ, Աստուածիմ, եթէ Սողոմոն որեւէ հայկական թերթի լուրջ, ընդարձակ յօդուածներ զրկէր, և փոխանակ վարձատրութեամբ քանի մը հարիւր ֆրանք առաջին իսկ պատեհութեամբ վըճարելի փոխառութիւն իննդրէր, մի՞թէ պիտի մերժէին...

Այսո՛, փոխառութիւն և ոչ թէ վարձատրութիւն: Թըքա՞ծ: Արդէն այդ վարձատրութիւնն ալ եթէ ստացած էր կրկին, ստացած էր ձնչուած սրաով միայն, հարկադրաբար...

Ու Սողոմոն սկսաւ, օրերով, մտովի թուել անունները բազմաթիւ հայերէն թերթերուն և մօտաւով ապէս պատկերացնել անոնց նիւթական կարողութիւնը, վճարունակութիւնը, ինչպէս կ'ըսէր ինք: Սակայն, յիշած գրեթէ բոլոր թերթերը չդիմացան լաւատեսօրէն գծուած իր բոլոր հաշիւներուն և անաչառ պատկերացումին:

— Մարտի խմբագիրը ուսուցչութեամբ իր հացը կ'ուտէր:

— Ասուպ, իրական ասուպի մը պէս, իօր մը կար, օր մը չկար:

— Կամի՞ իր գլուխը պահելու համար տարին տասներկու ամիս անյաշող վիճակախաղեր կը սարքէր կամ ներկայացումներ կը կազմակերպէր, որոնք ի նախարէն ի վեաս կը դառնային:

— Արցունե ողբալով կը զանգատէր թէ հարկադրուած է օտար զատարան դիմել անբարեխիղճ, չվճարող բաժանորդներէն իր իրաւունքը գանձելու համար:

— Միքի անընթեռնելի տառերը, գեղնած թուղթը, անվերջ թարգմանութիւններն ու ծայրէ ծայր արտատպումները, ամէն բանէ առաջ յետին չքաւորութիւն կ'աղաղակէին:

— Վարանդին հրապարակով յայտարարած էր, թէ պիտի մեռնի, եթէ հայ գիտակից հասարակութիւնը օգնութեան ձեռք չկարկառէ իրեն:

Միւս թերթերը՝ ճիշտն ըսած չէր գիտեր, կը շարու-



նակուէի՞ն թէ սուս ու փուս, այս ու այն անկիւնը շուն-  
չերնին փշած էին՝ հեզ ու հնազանդ:

Իսկ մնացեալներուն գրելը ուղղակի վարկաբեկուիլ կը  
նշանակէր...

Այս տխուր հաշուեկշիոն ընելով, Սողոմոն փողոցը ե-  
լած՝ մռայլ մտքերը հովին կուտար և հայ թերթերու վրայ  
դրած վերջին յոյսին հետ վերջին էիս գլանիկն ալ արմա-  
տապէս կը ծիէր ու, վերջին կրակը կրունկին տակ առնե-  
լով, ջղայնօրէն կը արորէր ու կը թքնէր վրան, երբ բո-  
լորովին անսպասելիօրէն, աւետարեր հրեշտակի մը պէս,  
յայտնուեցաւ ցրուիչը և Սողոմոնին երկարեց երազային  
կապայտ գոյնով նամակ մը, առաքողի բազմալեզուեան կո-  
չումով, գրասենեակով և հին ու նոր անուն-ազգանուննե-  
րով:

Սողոմոն ցնծուն բերկրանքով ստուգեց, թէ նամակա-  
դիրը Գրիշան էր:

Պատանեկան, երիտասարդական ազատ, ուրախ, աշ-  
խոյժ օրերը վարդագոյն տողանցքով մը արագօրէն անցան  
Սողոմոնի առջեւէն:

Դողդոջուն մատներով ու արոփող սրտով՝ նամակը բա-  
ցաւ վերջապէս:

«Ազի՛զ ջան,

Գրիշան էր: Ի՞նքը: Ամբողջովին ինքը: Ու Սողոմոն  
ստքի եղունգներէն մինչև գլխուն մազերը սարսուց...

«Ազի՛զ ջան,

«Փոշտային անկանոնութիւնների պատճառով՝ նամակդ  
միայն այսօր յաջողուեց ստանալ, երեւակայի՛ր, եթէ զըժ-  
քախտ պատահականութիւնը չլինէր և ես նամակդ իր ծա-  
մանակին ստանայի, ոչ թէ հազար, այլ տասը հազար ֆը-  
րանք պիտի ուղարկէի քեզ: Խսկ այսօր կոպեկ չունիմ. կո-  
ղոպտուեցի, սիրելիս, կողոպտուեցի և շատ փի՛ս կողոպտու-  
եցի: Պատմութիւնը երկար է: Չեմ ուզում քեզ էլ վշտակից  
անել. առանց այն էլ դարդեր շատ ունես:

«Ուրեմն խնդրում եմ ներես, ազի՛զ ջան, որ խնդրածդ  
չնչին գումարը չեմ կարողանում ուղարկել: Մեծ յոյս ունիմ,

որ ֆինանսական կրիզիսդ մի կերպ անց ես կացրել: Քէֆդ  
քէօ՛ք պահի, վերջը լաւ կը լինի:

«Բայց այս բոլորը մի կողմէ: Ծատ եմ խնդրում, որ  
հետաքրքրուես և իմանաս թէ տեղումդ կարելի՞է մեծ քա-  
նակութեամբ ձկնեղէն սպառել. ինչպէս նաև պանիր: Թէկ  
այս բոլորը ինձ համար չէ, այլ մի լաւ ծանօթի (Կւրոպա-  
ցի) բայց վստահ եմ որ պիտի հետաքրքրուես և գրես ման-  
րամասն: Ծանօթս ուղում է իմանալ թէ հօ ուժեղ մրցորդ-  
ների չի՞ հանդիպելու: Այսքան:

«Դէ՛, ազիզ ջան, ցը՛: Համբուրում եմ քեզ և կարօ-  
տից լաց լինում: Գլխիս երէկ ձերմակ մազեր տեսայ, երե-  
ւակայիր: Այ տղայ, դո՞ւ ոնց ես. հօ չե՞ս ձերացել...»

«Ցը՛: Համբոյրներ, Քո՛ Գրիշ:»

Սողոմոնի աչքերը խոշոր խոշոր բացուեցան, Տանջա-  
գին ու անթարթ երկար ու երկար նայեցաւ ձեռքին մէջ  
բնազդորէն ճիլտուած նամակին և մըմնջեց.

— Եւ դո՞ւն, Գրիշա...

Սողոմոն երբ առանց գլխարկի ու վերարկուի, գրեթէ  
սրթորթալով ու անվերջ փոշտալով սենեակը մտաւ, նու-  
նիկ, անհանգստօրէն դիտելով Սողոմոնի զունատ դէմքը և  
մարած, ապուշ կարած աչքերը, հարցուց.

— Ո՞ւր էիր այսքան ատեն...

— Ո՛չ յէկ տեղ, ո՛ւր պիտի ըլլայի, դո՞ւրսը...

— Դո՞ւրսը...

Դէմքը թթուեցուց նունիկ ու յարեց ջղային, արագ,  
զայրացկոտ շեշտով.

— Առանց վերարկուի, առանց գլխարկի, աշուն, ան-  
ձրե, խոնաւ օրով, չեմ հասկնար ի՞նչ կը փնտոս դուրսը,  
ժամերով...

Սողոմոն քիթը վեր քաշեց, գլուխը իր կամքէն ան-  
կախ թափահարեց և յաջորդաբար փոշտաց.

— Ահա՛... հարբուխն էր պակաս, շարունակեց նու-  
նիկ: Ահա՛ թէ ինչ կը փնտոէիր դուրսը... Սուրիկը չնամ-  
քուրես, թէ չէ կը սպաննեմ, գրեթէ ճչաց նունիկ և ջղա-  
բուրես:

յին շարժումներով անցնելով կիսաջարդ հայելիին առջև, քանի մը վայրկեանէն արդէն հնամաշ կօշիկները հաղած և նորոյթէ վաղուց ինկած գլխարկը դրած էր, պատրաստ դուրս գալու:

— Այդ ո՞ւր, նունիկ, թուքը կու առաջով հարցուց Սողոմոն:

— Նուազահանդէ՛ս...

— Զէ՛, իսկապէ՛ս...

— Ուրեմն, պարահանդէս...

— Այդ ի՞նչ խօսելու ձեւ է, նունիկ:

— Իսկ այդ ի՞նչ հարցում է, յուղմունքէն աչքերը փակեց ու դէմքը ծոմոնց նունիկ, չե՞ս գիտեր ուր երթաւըս, ի՞նչ է:

Սողոմոն զղաց: Յուսահատօրէն մոռացկո՞տ դարձեր էր: Ի՞նչպէս չէր յշեր, որ այսօր նունիկը պէտք էր Կարմիր Խաչը, բժիշկի մօտ երթար... Ուրիշ ո՞ւր կարելի էր երթալ...

Եւ ծանր ու մոայ՝ Սողոմոն լոեց: Զգոյշ վեր ելաւ տեղէն, օգնեց նունիկին գունաթափ վերարկուն հագնելու. հոս հոն իյնալով գտաւ և նունիկին տուտաւ անոր ձեռնոցները, որոնց գրեթէ բոլոր մատները լուսաւոր, մեծ կամ պղտիկ ծակեր ունէին... Հիւանդ մպիտով մինչև փողոցին զուռը ճամբու դրաւ կինը և անյուսօրէն, ծոյլի ու ծերունիի շարժումներով սենեակը վերադառնալով, հարբուխով բոնուած գլուխը ձեռքերուն մէջ առաւ և երկար ու երկար տանջուեցաւ մէկ հատիկ մտքով՝

— Եթէ «Նորին Մեծութիւնը» այլեւս չհամաձայնէր ապառիկ հաց ու մթերք տալ, ի՞նչ պիտի ընէր... .

#### 4.

— Թքի՛ր, մարդ Աստուծոյ, թքի՛ր այդ գրականութեանդ վրայ և որեւէ ուրիշ գործնական բանի լծուիր. վերջ ի վերջոյ եթէ անտանելի չէ, ամօթ է, գոնէ ինքնասիրութիւն ունեցիր...

Վրդովլուած ու սաստած էր յաճախ նունիկ, տեսնելով որ Սողոմոն փորձութիւնն ունի այս անգամ առանձին ընդարձակ աշխատութեան մը ձեռնարկելու, մինչև անգամ յաւակներով առանձին գրքով հրատարակել տալ:

Սակայն Սողոմոն ոչ միայն չէր թքներ, այլ և նունիկի հանդէպ իր ունեցած անհուն մէրը հազիւ կը բաւէր, որպէսզի ներէր նման «առնուազն չմտածուած արտայայտութիւններ»...

— Ինչպէս թէ թքնել... ամօթ է, նունիկ, ամօթ է...

Ու թէւ չէր կրնար նունիկը համոզել, բայց ինք հաստատապէս համոզուած էր թէ «Լուսափիւր», Մատենաշարը սիրով և չնորհակալութեամբ պիտի ընկունէր իր գրքի հրատարակութեան առաջարկը և, ամէնէն քիչը, կանխիկ երեք հազար ֆրանք պիտի տար իրեն, իրբու հեղինակի իրաւունք:

— Կը տեսնես, նունիկ, կը տեսնես...

Սակայն նունիկ ոչ տեսնել, ոչ ալ մանաւանդ լսել կ'ուզէր: Ան հիմա Սողոմոնի զոյգ մը գուլպաներու բազմաթիւ ծակերը բազմագոյն թելերով կը խցկէր:

Անկողին մտած, ծանր գլուխը աշ ձեռքին յենած՝ Սողոմոն կը փորձէր «Կումունիստական Մամիքեսսի հիմնական սխալները բռնել և Մարքսն ու էնգէլսը նոր օրերու լոյսին տակ քննելով՝ իր հետագայ գրքին համար ատաղձ պատրաստել:

«... Բուրժուազիան հմայքէ գրկեց գործունէութիւններու բոլոր տեսակները, որոնք ակնածանք ու պատկառնք կը վայելէին երբեմն: Անիկա իր վարձու բանուորները գարձուց բժիշկը, իրաւաբանը, քահանան, բանաստեղծը, գիտնականը»:

Սողոմոն քահ քահ կը ծիծաղէր և ասանձնապէս կ'ընդգծէր «Կումունիստական Մամիքեսսի վերոյիշեալ տողերէն վարձու բանուորները և բանաստեղծ ու գիտնական բաները:

Սենեակին մէջ ծխելու համար նունիկէն թոյլառութիւն խնդրելով և ստանալով՝ Սողոմոն ոգեւորութեամբ ա-

ոաջ կը տանէր իր ընթերցումը և շուտով կը հանդիպէր հետեւեալ տողերուն .—

«Ազգային միակողմանիութիւնն ու սահմանափակումը երթալով աւելի անհնարին կը դառնան և բազմաթիւ ազգային ու տեղական գրականութիւններէն կը գոյանայ միասնական համաշխարհային գրականութիւն . . .» :

— Վաս չէ, լաւ գուշակութիւն է, ճիշտ ձեր ըսածն ալ եղաւ, սիրելի Մարքս և Էնդելս, բարձրաձայն կը հնչէր Սողոմոն և ներողամիտ ժպիտով ամբողջ այդ հատուածը կ'եղունգէր:

Աւելի առաջ անցնիլ չկրցաւ, սակայն: Հազիւ կերպոնացած, նոյնիսկ քննադատութեան սկսած մտքերը՝ վայրկեան մը կուտակուած մժեղներու խումբին պէս՝ կարծես գօրաւոր հովէ մը ցրիւ եկան ու անհետացան: Վասնզի սենեակի միւս անկիւնէն նունիկ յայտնեց թէ՝

— Պէտք է «Նորին Մեծութեան» մօտ վազել, որովհեաւ աղը, շաքարը, սապոնը և հացը, խօսքը մէկ ըրած, սպառուած են . . .

Կարծես նունիկ կ'առաջարկէր երթալ կեանքի և մահուան պայքար մղել հէքեաթի եօթը դեւերուն հետ . . .

Այսօր ամսի վերջն էր: «Նորին Մեծութեան» դրամը վճարելու վերջին օրը:

— Հասկնալի է, մրմնջեց Սողոմոն, պատասխանելով իր ինչ որ ծանր մտքին և «ԿուսուԵիսական Մանիքես»ը փակելով, անդունդէ անդունդ իջաւ մոայլ մտքերու մշուշին մէջ, առանց պարզօրէն լսելու նունիկի քաջաւերանքը:

— Դէ՛, Ե՛լ, Ե՛լ գուշականերդ պատրաստ են: Եթէ քիչ մը գգոյշ ըլլաս, երկար կը դիմանան . . .

## 5.

Անցաւ մէկ ամբողջ ամիս և Սողոմոնի կեանքին մէջ ահազին փոփոխութիւններ տեղի ունեցան:

Դժբախտութիւն, բախտաւորութիւն փոխն ի փոխ յաջորդեցին իրարու, թէև Սողոմոն շարունակեց, ըստ նու-

նիկի վերջին մէկ արտայայտութեան՝ լաւատիսութեան համաշխարհային մրցանիշը կոտրել:

— Սիրելիս, փոխանակ յօդուածներ գրելու թերթերուն, որոնք վերջի վերջոյ խանութպաններուն միայն պիտանի կը դառնան, աւելի լաւ է նստիս Շոպէնհաուէրը ծայրէ ծայր հերքես և անձնական կեանքդ կենդանի օրինակ դարձնելով՝ հիմք զնես մէկ նոր, ծայրայեղ լաւատեսութեան փիլիսոփայութեան:

Անողոքօրէն կը հեգնէր նունիկ, երբ Սողոմոն ձեռքերը ուրախ ուրախ իրար շինուագոյն բախտաւորութիւններէն մէկն ալ այն էր, որ Սողոմոն արդէն իսկ գրած էր իր ծրագրած գրքի չորս մասերէն առաջին մասը, յիսուն էջ, և շարունակութեան համար ինչ ինչ դժուարութիւններու բախելով, բարւոք համարած էր նամակով մը դիմել «Լուսափիւռ» Մատենաշարին, իր գրքի հրատարակութեան խնդրանքը մատուցանելով անոր:

— Կը պատասխանեն թէ առ ալժմ չհնք կրնար, կը գուշակէր նունիկ:

Սողոմոնի վիճելու բոլոր կիրքերը կը մէկտեղուէին և, կարծես նունիկ Մատենաշարի վարիչն ըլլար, պինդ կը բռնէր անոր օծիքէն:

— Ինչպէ՞ս թէ չէք կրնար:

— Չենք կրնար, կը պատասխանէր նունիկ ժպտուն:

— Սակայն, Վեհունիկ գիրքը տպեցի՛ք:

— Տպեցի՛ք:

— Ուրեմն կրնա՛ք:

— Չենք կրնար, ո՞ր մէկը տպենք:

— Ի՛մս, վասնզի խիստ ժամանակից նիւթ է:

— Չենք ժխտեր, բայց դրամ չունինք:

— Ունի՛ք:

— Չունի՛նք:

— Կ'ըսեմ՝ ունի՞ք:  
 — Կ'ըսեմ՝ չունի՞նք:  
 — Ե՛, այդ եղածւ, այդ պատասխան է, նունիկ...  
 — Ինչո՞ւ չէ, հրաշալի՛ պատասխան, և ձի՛շտ պատասխան:

Նունիկի ժպիտէն վարակուած, Սողոմոնն ալ գայրոյթը մէկդի կը նետէր և վայրկեան մը անմտօրէն բայց դո՞ն ծիծալելով անմիջապէս կը շարունակէր.

— Կատակը մէկ կողմ, իմ գիրքն հրատարակելով Մատենաշարը հարիւրին հարիւր կը շահի...

— Այսի՞նքն:

— Այսի՞նքն կը շահի էլի՛, առնուազն հազար օրինակ կը սպառուի:

— Քանի՞ տարիէն... Յետոյ, հազար օրինակը տպագրութեան ծախսը չի հաներ, նախկին ժպիտով կը պատասխանէր նունիկ հազուադէպօրէն ուրախութեան արամադրուած այսօր:

— Կը հանէ, դուն չես գիտեր:

— Չի հաներ:

— Կը հանէ, նունիկ, կը հանէ, երախայ ես, հազար օրինակը պղտի՞կ բան կը կարծես...

— Այդ քու հազարը եթէ հարիւր հազար ալ շինես, դարձեալ չես կրնար համոզել Մատենաշարը, որ քու գրելիք գիրքդ տպէ:

— Ինչո՞ւ:

— Այնպէ՞ս:

— Լա՛ւ, ինչո՞ւ:

— Որովհետեւ հրատարակողը Մատենաշարն է և ոչ թէ Սողոմոն ներկարարեան:

— Այսի՞նքն:

— Այսինքն՝ Մատենաշարը Սողոմոնի պէս ո՛չ համաշխարհային լաւատես է, ոչ ալ տիեզերական միամիտ:

— Ի՞նչ կապ ունի... Քիչ մը վրդովուած ուսերը կը թօթվէր Սողոմոն, նայելով կիսաշարդ հայելիին, կարծես ան երրորդ անձնաւորութիւն մը ըլլար և գլխով իր համա-

ձայնութիւնը տար, կրկնելով.

— Հարկա՛ւ, ի՞նչ կապ ունի...:

Սպարդիւն վիճաբանութենէ ձանձրացած՝ Սողոմոն դուրս կու զար սանդութին վրայ աժանազին ծխախոտը լիաթոք շնչելու, բայց տեսնելով որ տանտիկինը զբաղուած է իր շնիկը սուրճով և խմորեղէնով կերակրելով, իսկոյն կը զղջար իր դուրս ելլելը.

Այս «խելազարը» կրկին տան վարձքի խնդիր չհանէ, կը խորհէր:

Աւա՛զ, տանտիկինը խէթ խէթ կը նայէր արդէն, և Սողոմոն հարկադրուած եղաւ ողջունել ու իբրև հին բարեկամութեան ու նոր հաշտութեան նշան բերանը բացաւ.

— Արդէն խուռաց ցուրտ է, այնպէս չէ, յարգելի տիկին, աշո՛ւն...

Տանտիկինը, զարմանալի՛ բան, ժպտեցաւ և ոչ միայն սենեակի վարձքի մասին ոեւէ անախորժ խօսք չըրաւ, այլ և Սողոմոնին յանձնեց արտասահմանեան բաց նամակ մը, որ ցրուիչէն ստացած և, չես գիտեր ինչո՞ւ, շաբաթէ մը ի վեր իր հասցէին չէր տուած:

Սողոմոնի յաջողութիւնները կրկնակի էին և ան խորունկ, իսկա՛պէս անկեղծ շնորհակալութիւններ յայտնեց տանտիկնոջ:

Աւա՛զ:

Մատենաշարի վարիչը իր հատիկ հատիկ ձեռագրով, ցաւօք սրտի կը ծանուցանէր, թէ ոչ միայն հնարաւորաւթիւն չունին Սողոմոնի գիրքը տպելու, այլ և ընդհանրապէս նոր հրատարակութիւններ ընելու: Յետոյ, ամենայն հաւանականութեամբ ստիպուած պիտի ըլլան իրենց գեղեցիկ ձեռնարկը վերջնական հայուեյարդարի ենթարկել: Այս տխուր իրողութեան առջև չկանգնելու համար, Մատենաշարի վարիչը, ինչպէս շատ ուրիշներէ, նոյնպէս և Սողոմոնին թախանձագին կը խնդրէր յանձնառու ըլլալ վեհունիի գիրքէն զէթ յիսուն օրինակ սպառել իր շրջանի տեղական գաղութին մէջ: Անհամբեր սպասելով Սողոմոնի գըրական պատասխանին և կանխաւ, սրտանց շնորհակալու-

թիւններ յայտնելով՝ Մատենաշարին վարիչը Սողոմոնին կը յատուցանէր իր անկեղծ սէրն ու կատարեալ յարդանքները...

Սողոմոն կը յուզուէր, կը բորբռքուէր. սենեակին մէջ երթեւեկիլու տեղ կը փնտոէր և նունիկի բարի ծիծաղի ազդեցութեան տակ տակաւ կակլած՝ վերջնական ձմարտութիւնը և փրկարար մխիթարութիւնը գտած ըլլալ կը կարծէր՝ դառնութեան և կշտամբանքի խօսքեր նետելով՝ Մատենաշարի հնուաւոր վարիչին:

— Դգո՛ւմ, դգո՛ւմ... հարկա՛ւ: Քեզ նման դդումին մէկը եթէ բերեն նստեցնեն գործին գլուխը, հա՛րկաւ գլուխը կ'ուտես...

— Եե՛խ թէ դդում, այդ մարդը իր քանի մը տող նամակով սքանչելի պատեհութիւններ կու տայ քեզի, լըրջօրէն կը նկատէր նունիկ:

— Ի՞նչ պատեհութիւն, թէ արտաքուստ արհամարտ հանքով, բայց ներքուստ հնուաւոր յոյսի հնչիւններ ունկնդրելով կը հարցնէր Սողոմոն:

— Պատեհութիւն մը, որպէսզի աչքերդ բանաս:

— Այսի՞նքն:

— Այսինքն՝ թքնես գրականութեանդ վրայ և...

— Ամօթէ, նունիկ, ամօթէ, անկեղծօրէն կը որտամտէր Սողոմոն և զրպաններն ու սենեակի բոլոր անկիւնները ի զո՞ւր փնտառուքի կ'ելլէր՝ մոռցուած, դեռ չծըխուած, կիսատ ձգուած գլանիկ մը գտնելու յոյտով:

Յաջորդ օրը նոր ստացուած արտասահմանեան թերթերէն մէկուն մէջ Սողոմոն Հանդէս-Խնջոյի բաժնին տակ կը կարդար, թէ ոմն օր. Արմաւենի յաջողութեամբ արտասահմանէ էր իր հին օրերու գրական մէկ կառըր. իսկ քիչ մը նած գրական կարճ տեսութեան մը մէջ անծանօթ յօդանդին, գրական կարճ տեսութեան մը մէջ անծանօթ յօդուածագիր մը ի մէջ այլոց կը գրէր. —

«... Հակառակ այս անապատային ամայութեան, պէտք է խոստովանիլ թէ կան Սողոմոն ներկարարեանի նման տաշէ յանդասովանիլ թէ կան Սողոմոն ներկարարեանի նման տաշէ յանդասովանիլ թէ կան Օրողներ, որոնք հայ խօսքի վարպետներ են...»:

Առաջին օր, ուղղակի հոգիէն բխած երանութիւն մը ճանունակը, ուղղակի հոգիէն բխած երանութիւն մը ճանունակը, ուղղակի հոգիէն բխած երանութիւն մը ճանունակը, ուղղակի հոգիէն բխած երանութիւն մը ճանունակը,

ուազայթելով կը լուսաւորէր Սողոմոնի քիչ առաջ մարած աչքերը: Համելի էր կրկին ու կրկին կարդալ: Լրագրական սովորական անիմաստ ու անբովանդակ տողեր չէին ատոնք: Օդ, ջուր, սնունդ էին ատոնք, ընդունակ Սողոմոնի կարծես երերացող հաւատն ու լաւատեսութիւնը տակաւին երկար ու երկար նախկին, հին օրերու ուժին, վեհութեան ու պայծառութեան մէջ պահելու:

— Ուրեմն անապատի մէջ չենք ապրիր, կը ցնծար Սողոմոնի հոգին: Ուրեմն գրականութեամբ հետաքրքրուողներ կան տակաւին: Բարոյապէս գնահատողները չե՛ն պակսիր, ուրեմն...

Այս, փա՛ռք Աստուծոյ:

Սողոմոնի հոգին ցնծալու մասնաւոր պատճառներ ալ ունէր: «Նորին Մեծութիւնը», թէև քիչ մը խոժոս ու գէշ տրամադրուած, բայց և այնպէս համաձայնած էր ամիս մը եւս ապառիկ կենսամթերք տալ: Արտասահմանեան հին նամակ մը ձեռքը բռնած՝ Սողոմոն ապահոված էր «Նորին Մեծութիւն»ը թէ ա՛յդ իսկ նամակով կը գրէին իրեն այն 2000 ֆրանքնոց չէքի մասին, զոր շուտով պիտի ղրկէին արտասահմանէն և որ պիտի ստանար, ամէնէն ուշը, այս ամսու վերջերը, թերեւս աւելի՝ շուտ...

— Պատուայս վրայ կ'երգնում, յարգելի՛ տիկին:

— Ինդրեմ, կը հաւատա՛մ, միայն թէ կրկին գրեցէք իրենց, որպէսզի չուշացնեն, ճեղի համար ալ լաւ կ'ըլլայ, այնպէս չէ՞... իսկ ես դրամի պէտք ունիմ, այնպէս չէ՞...

— Անպատճա՛ռ, յարգելի տիկին, անպատճա՛ռ: Սողոմէս շնորհակալ եմ: Յարգանքնե՛րս:

Ու Սողոմոն, հանապազօրեայ կենսամթերքներով բեռնաւորուած՝ ցնծուն ու յաղթական, սենեակը մտած էր նունիկն անգամ ապուշ ծգելով:

Անսպասելի յաղթանակի ցնծութիւնը կը տեւէր տակաւին, վասնզի ամսու վերջը բաւական հեռու էր: Հաց ու մթերքով ապահովուած ամբողջ տասներկու օրեր կային գեռ...

Ու նաև անպակաս յոյսեր: Վասնզի Սողոմոն, երկար

տատանումներէ, Նունիկի հետ անվերջ վիճելէ, (պահեր եղան երբ լրջօրէն խռովեց ու զիրար բնա՛ւ չնասկցան), անցեալը ներկայի հետ համեմատելէ և ապագան ծանր ու բարակ կշռելէ ետք, եկած էր այն յստակ եղրակացութեան, թէ կարելի է ուսուցչական թեկնածու ներկայանալ տեղական հայ գաղութի դպրոցին համար:

— Գէթ մէկ ոտքը ամուր գնելու չափ հող կ'ունենանք, Նո՞ւնիկ:

Խոդրե՛մ, Միայն Նունիկ յոռետես էր կրկին:

— Երախա՞յ ես, Նունիկ, ինչո՞ւ:

— Նախ՝ չեն վարձեր, Երկրորդ՝ եթէ վարձեն՝ զրամ չեն տար: Երրորդ՝ եթէ տան՝ աչքդ դուրս հանելով կուտան: Չորրորդ՝ ամէնէն վաւերականը՝ տարուան կէսին կոիւ-արիւնէնեղութիւն կ'ընեն, դպրոցը կը փակեն և... փառք յաւիտեանս, ամէն...

— Է՛հ, Նո՞ւ-նի՛-կ, կը ջղայնանար Սողոմոն և բարկութիւնը շուտով կ'անցնէր, երբ կը յիշէր թէ խնդրագիրը, պատշաճ վկայականներով զօրացուած, արդէն զրկած էր Հոգաբարձութեան:

Պակաս չէին տրուած խոստումները, Նոյնիսկ հեռու վայրերէ միջնորդութիւնները:

Ու գօտեպինդ՝ Սողոմոն կը սպասէր Հոգաբարձութեան այն նիստին, ուր պիտի վճռուէր, ինչպէս Նունիկը կ'ըսէր, խնդիրներու խնդիրը՝

— Լինե՞լ թէ չլինել...

6.

Նունիկ այդ առաւօտը նախաճաշի համար խոշոր հողէ աման մը լեցուն տաք տաք գետնախնձորներ կը կճպէր բարակիկ, կարծես մոմեղէն մատները այրելով երբեմն:

Բատ սովորութեան Նունիկ խօսք կը բանար.

— Հը՛, շի հոգաբարձուն չպատասխանեց Նորէն:

Սողոմոն չէր լսեր, Ան գինովցած էր պարզապէս: Սունկի եկած փափլիկ Սուրբիկի օրօրոցին առջև, կը շաղա-

կրատէր, ժողովրդական երդի մը ուրախ եղանակին յարմար-ցնելով յանպատրաստից ոտանաւորներ կը հիւսէր, երգելով ու փառաբանելով Սուրբիկի մարմնիկի բոլոր առանձնայատուկ մասերն ու մանրամանութիւնները: Եւ երբ Սողոմոն նին կը թուէր թէ Սուրբկը կը ժպտի, նոյնիսկ կը հասկնայ զինքը:

— Ճի՛ իկ...

Կ'ըսէր ու ահազին բրդոտ գլուխը կը փորձէր տեղաւորել Սուրբիկի փորիկին վրայ:

— Քեզ հետ եմ, կը կրկնէր Նունիկ, այդ քու շիլ հոգաբարձուդ նորէն պատասխան չտուաւ:

— Ինչպէ՞ս, ինձ հե՞տ էիր, Նունիկ:

— Այս՛, կ'ըսեմ այդ գոված հոգաբարձուդ նորէն չըպատասխանեց:

— Ի՞նչ հոգաբարձու, ո՞րը:

— Շիլը:

— Շի՞լը...

— Այս՛, կ'ըսեմ նորէն չպատասխանեց, մինչդեռ դուն կ'ըսէիր, թէ անոր մէկ հատիկ շիլ աչքը չես փոխեր ամբողջ գաղութի ողջ աչքերուն հետ...

— Կը պատասխանէ՛... Այսօր չպատասխանէ, վաղը չպատասխանէ մի՛ւս օրը կը պատասխանէ, դուն հոգ մի ըներ, Նունիկի:

— Երանելի՛ մարդ...

— Ինչո՞ւ է...

— Դէ՛, ի հարկէ... միայն քեզ նման ի ծնէ միամեները կրնան յուսալ թէ հոգաբարձութիւնը պիտի վարձէ քեզ...

— Եա՛... Ինչո՞ւ, եղբա՛յր, զրեթէ կը վիրաւորուէր Սողոմոն: Համալսարանական մարդ եմ: Տասը տարուան մանկավաժական փորձառութիւն ունիմ: Փառք Աստուծոյ, զըրոց-բրոց եմ և քու լուսահոգի նիցչէի արհամարհած «անթիւ շատերու» շարքին մէջ չիմ՝ անյայտ, անանուն...

Նունիկ դառնօրէն կը ծիծաղէր.

— Եկո՞ւր, եկո՞ւր, կ'ըսէր, դուն անթիւ շատերէն մէ-

կը չես, բայց առածդ գետնախնձորներուն մէջ «անթիւ շատերը» աւելի՛ շատ են...

Սողոմոն կ'ուզգուէր դէպի փճացած գետնախնձորներու բլուրը: Ու, հանելուկ վճռել ուզող բայց չկրցող մէկումը պէս, գլուխը կ'օրորէր:

— Այդ բոլորը «Նորին Մեծութիւնը» տուաւ: Զիմ գիտեր ինչու այդ պառաւ փերեղակուհին իմ դէմս լեցուած է վերջերս: Երեւակայէ՛, ամէն զնումիս փոտած կամ փճացած բան մը պիտի կոյիէ պայուսակիս մէջ: Անցեալ օրուան չորս հաւկիթներէն երեքը հոտած էին, գիտե՞ս:

Ու Սողոմոնի փիլխոփայելու ախորժակը կը բռնէր:

Գիտե՞ս ինչ, նունիկ, յաճախ մտածած եմ թէ այս խանութպանները ոչ թէ լոկ բան մը աւելի շահելուն համար կը ստեն, կը խարեն կամ կը խարդախեն, այլ պարզապէս, ի՞նչպէս ըսեմ, արուեստի՛ համար: Յանուն արուեստի: Ճշմարիտ: Աստծու ամէն օր և ամէն յաճախորդի գըլխուն անոնք խարելու և խարդախելու իրենց արուեստը կը կիրառեն ոչ թէ միայն բան մը աւելի շահելու համար, այլ մանաւանդ աւելի ու աւելի՛ կատարելագործուելու համար: Ներքին խորո՛ւնկ բաւականութեան համար, որ, ամէն պարագայի տակ, քիչ մը հեռու է սոսկ նիւթական շահ ըլլալէ: Այլապէս, ըսէ՛ խնդրեմ, «Նորին Մեծութիւնը» ի՞նչ շահեցաւ այս փճացած գետնախնձորները ինծի քշելով: Հաշուէ, և կը տեսնես որ երկու կոպէկ հազիւ կը բռնէ... Երկու կոպէկ, երեւակայէ, երկու կոպէկ... Աստուած վկայ: Եւ դուն այնքան միամիտ ես թէ ան լրջօրէն պէ՞աք ունէր այդ երկու կոպէկին, ան, նոյն ինքն «Նորին Մեծութիւնը», որուն վեց փեղկերով խանութը իր պարունակութեամբ եթէ ծախելու ըլլաս, հայ գրականութեան ամբողջ նոր ձեռագիրները տասնեակ հազար օրինակներով կը հրատարակես... Յետո՛յ...

Բայց Սողոմոնի յետոյէն առաջ սենեակին դուռը: իր կրունկներուն վրայ հեծկլտալով՝ մէջքը պատին տուած՝ լայն բացուած էր, խոնարհաբար ճամբայ տալով նոյն ինքն «Նորին Մեծութեան»:

— Յարդանքներս, խզզաց տակառակերպ խանութպանուհին, որուն թուշերը կարծես խեղկատակին մէկը պաշտօնապէս փչած, փամփուշտի պէս ուսեցուցած էր, իսկ վիզը որոշապէս եօթը սասրագծուած ծալքերով դասդասած:

— Յարգանքներ՝

Ու «Նորին Մեծութեան» թարթիչները ոտնակոխ ըրած և մինչև յօնքերը բարձրացած սրատես աչքերը՝ արագ շրջապտոյավ մը ոչ միայն հաշուառման ենթարկեցին Տէր և Տիկին Ներկարարեաններու սենեակային ամբողջ ստացուածքը, այլ և խանութպանային մտքի պայծառութեամբ ե՛ւս առաւել լուսաւորուած՝ որոշեցին անոնց դրամական արժէքը՝ ըստ շուկայի օրուան գիներուն:

— Եւ այս օտարական շուները իրենց յետին չքաւորութեամբ պիտի կողոպտեն զիս, դրա՛մս պիտի ուտեն... որոճաց «Նորին Մեծութեան» ուղեղը:

Մինչ վերջին կէս կանանչագոյն և կէս ածխագոյն գետնախնձորը Նունիկի գողահար ձեռքէն, փոխանակ պնակին մէջ իյնալու, գլորուելով կ'երթար իր նախկին, հարազատ տիրոջ, «Նորին Մեծութեան» ոտքերուն առջև պառկելու, ասդին Սողոմոն բնազրօրէն իր շապիկը կը կոճկէր ու թուք կուլ տալով բայց խուխը ամբողջութեամբ կոկորդէն վարքնել չկրնալով, սովորականէն բարձր ճայնով կ'արտասանէր:

— Յարգանքներ՝

«Նորին Մեծութիւնը» Տէր և Տիկին Ներկարարեաններու դէմքերուն վրայ իր ուզածը անձայն ու աւելի արագ կարդաց, քան ուեկ նամակի՝ մայրենի լեզուով: Բացայայտ էր թէ «Նորին Մեծութիւնը» հասած էր իր նպատակին, իր պաշտօնական ներկայութիւնը ցուցադրելով սենեակի մը մէջ, ուր իր վազեմի յաճախորդները կ'ապրէին: Հիմա հարկ էր միայն ահաբեկումը օրինականացնել և գործնական հունի մէջ դնել:

— Պարոնը, սկսաւ «Նորին Մեծութիւնը», գիտէ՞ թէ որքան պարտք ունի: Այսօր երբարդ ամսի առաջին օրն է...

Ու մինչեւ պատասխան ստանալը դեղնած, ջրակալած աչքերուն և հաստ, ճաքքառած շրթունքներուն անվերծանելի ժպիտ գոյացուց, միաժամանակ դիտելով նունիկի և Սողոմոնի բնական գոյները նետած դէմքերը:

Սողոմոն ուժերը հաւաքեց, պատասխանը հայերէնէ տեղական լեզուին թարգմանեց մտովի և ապա, մաքէն շրթունքներուն փոխանցելով՝ գրեթէ հեղեց.

— Ներեցէ՞ք, յարգելի տիկին, որ դրամը ուշացանք... Անմիջապէս, արա՛գ կու տանք:

«Նորին Մեծութիւնը» կարեւոր համարեց աւելի որոշ նախադասութիւններ լսել:

— Անմիջապէ՞ս, ինդրեմ տուէ՞ք, ես պարոնին միշացած եմ, թէ դրամի պէտք ունիմ և պարոնը պատույ խօսք տուաւ, այնպէս չէ՞:

— Հիմա ո՛չ, յարգելի տիկին, վաղը կանուխ կ'երթամ մինչեւ դրամատունը, երեկոյեան ձեր դրամը տեղի կ'ունենայ մի՛ վախնաք:

«Նորին Մեծութիւնը» լրջացաւ: Վախնա՞յ: Ո՞վ: Ի՞նք, ի՞նչո՞ւ վախնար: Ի՞նք գանձելու բոլոր դիւրութիւնները ունի: Ի՞նք եկած է միայն յայտնելու, թէ պարոնը պարագ ունի 946 փր. եւ 45 սանրիմ: Գուցէ պարոնը չէր գիտեր, այնպէս չէ՞:

Ու «Նորին Մեծութիւնը» հաշուեթուղթի պատառիկ մը պարզեց Սողոմոնի դոդոջուն ձեռքերուն:

Սողոմոն, լոկ ձեւի համար, նայեցաւ գումարին ու ըստ:

— Բարի՛, բարի՛:

Եւ ներքին անզուսպ մղումի մը անձնատուր՝ աւելցուց:

— Մենք այն մարդիկը չենք, յարգելի տիկին, մենք չայ ենք:

— Ի՞նչպէս:

— Կ'ըսեմ մենք չայ ենք...

— Ես պարոնին լաւ չեմ հասկնար, ի՞նչ կ'ըսէք, արմէն:

— Այո՛:

— Իսկ ի՞նչ բան է արմէն:

— Արմէն, ուժերը եւս առաւել հաւաքելով բացատրականի սկսաւ Սողոմոն, արմէն հնացած մարդեր են, առանձին լեզու և ոչ թէ ոռւս, առանձին բոլորովին առանձին. յարգելի տիկինը չէ կարդացեր, բարբարոս թուրքեր...

«Նորին Մեծութիւնը» բացասական նշաններով գլուխը կ'օրուէր:

— Գուցէ յարգելի տիկինը զիտէ Արարատը, Նոյի սնտուկը... լսած չէ՞ ափսո՞ւ...

— Զեմ հասկնար, առանց ափսոսանքի և գոմէշալին ուսերը վեր քաշելով խօսեցաւ «Նորին Մեծութիւնը», չեմ հասկնար: Ինձ համար բոլորը մէկ են ոռւս, գերմանացի, արմէն կամ հրեայ: Այնպէս չէ՞:

Ու շեշա՛ Սողոմոնի միշտ խուսափող աչքերուն նայելով աւելցուց:

— Ուրեմն վա՛զը դուք անձամբ կը բերէք ձեր պարտքը իմ վաճառատունս, 976 փրանք և 45 սանթիմ, այնպէս չէ՞:

— Այո՛, այո՛, յարգելի տիկին:

Ու «յարգելի տիկինը» կրկին վերէն վար նայելով ու ինքինքը պաշտօնապէս շեշելով Սողոմոնի ահաբեկուած աչքերուն մէջ:

— Յարգանքներս, արտասանեց խզիզալով և տակաւին բաց մնացած գուռնէն գուրս գալով, սանդուխի քարէստիճաններէն վար իջաւ հանդարտ ու ծանրակշիռ քայլերով:

Երբ այլեւս չէր լսուեր «Նորին Մեծութեան» հանդիպաւոր ոտնաձայնը և տակաւ կը փարատուէր կասկածը անոր հա վերադարձին, նունիկ, իօկական կնոջ մը նման պատուագդած ու ջղային, դառնօրէն մըմնջեց.

— Տեսարա՛ն, կատարեա՛լ տեսարան, ահա՛ թէ ուր հասանք...

Սողոմոն իր կարգին յուզուեցաւ, բնազդօրէն ուղղուեցաւ դէպի կինը, քնքշանքով բռնեց անոր զլուխը, թեթեւօրէն սեղմեց կուրծքին, մեղմօրէն համբռւրեց անոր սե սաթի փայլով առատ մաղերը և աւելի ու աւելի աճող յուզումով մղկաց.

— Մի՛ յուզուիր, ջանիկս:

Սողոմոնի այս քնքշանքին ու համբոյրին տակ նունիկ տարօրինակ սարսուռ մը զգաց և բնազդօրէն քիչ մը ետքաշուեցաւ, Յետոյ ինքզինքին տիրապետեց, գետնախնձորին պնակը մեղմօրէն սեղանին վրայ դրաւ և մօտենալով խաղաղօրէն ննջող Սուրբիկի օրօրոցին՝ անտեղի կերպով սկսաւ օրօրել...

Օրը վերջացաւ, այսպէս կամ այնպէս:

Խաշած գետնախնձորները նունիկի և Սողոմոնի կողորդներէն հազիւ վար գացին, Զգիտցան՝ ճաշի ժամը ե՛րը եկաւ անցաւ և ինչո՞ւ գէթ պնակ մը երկու լուբիա չպատրաստեցին կերան: Սակայն, դեռ չմթնած, փոխադարձ համաձայնութեամբ կարեւոր վճիռ մը տրուած էր: Պէտք էր վճարել «Նորին Մեծութեան» պարտքը, եթէ հնարաւոր էր մինչև վերջին սանթիմը: Այո՛, այո՛, Երկուքն ալ համաձայն էին «Նորին Մեծութիւնը» իրենց կարծած խանութպաններէն չէր, այլ զզուելի, ուղղակի հրէշ:

— Այնպէս չէ՞ նունիկ...

— Այդ անզգամը կրնայ դատարան, ոստիկանութեան դիմել...

Սողոմոն թէև նունիկի կասկածը չէր բաժներ, բայց և այնպէս հանգիստ ալ չէր:

— Ես գտատրանէն վախցող չեմ, նունիկ, միայն թէ աս ու ան կ'իմանան, անուսս կ'ելլէ, ո՞վ զիտէ վերջը ի՞նչ պոչ կը կպցնեն, մանաւանդ հիմա երբ ուսուցիչ պիտի ըլլամ. աշակերտներ, ծնողներ, հասարակութիւն, թերթեր... Այո՛, ուրիշ ճար չկայ, պէտք է այդ անիծեալ գումարը ճարել և վճարել: Փոխ է, պարտ է, ինչ որ է, պէտք է ճարել և վճարել:

Բայց սրովհետեւ գաղութի բոլոր ընկեր, բարեկամ,

ծանօթ անունները օրուան ընթացքին քանիցս ցուցակավրելով և մէկիկ մէկիկ անոնց անցեալն ու ներկան, նկարագիրն ու դրամական կարողութիւնները բազմակողմանի քննութեան մը բովէն անցընելէ ետք՝ գտած էին թէ անհնար է նոյնիսկ տառը ֆրանքի փոխառութիւն կնքել՝ ուստի միաձայն վճռուած էր.

Նախ Սողոմոն ուղղակի պիտի ներկայանար չիլ հոգաբարձուին, եթէ չիլը սովորականին պէս — «Ձեր ուսուցիչ վարձուիլը իրողութիւն է, փաստ է, միւսիւ Սողոմոն», ըսէր, այն ատեն Սողոմոն հեռուէն, մօտէն, ակնարկելով, իր բացառիկ ծանր կացութիւնը այսպէս կամ այնպէս պիտի պարզէր և... քիչ մը կանխալճար պիտի խնդրէր: Ճիշտ է, գուցէ գէշ կ'ազգէր, բայց...

— Ի՞նչ ըրած... գոնէ ասոնք օտար չեն, հայ են, նունիկ:

Իսկ եթէ չիլ հոգաբարձուէն բան մը դուրս չգար, այն ատեն ժամացոյցը իր ոսկի շղթայով դրաւ պիտի դնէր տեղ մը ու դրամն առաջ՝ շիփչիտակ «Նորին Մեծութեան» խանութը պիտի ուղղուէր:

— Լա՛ւ, յետո՞յ, կը հարցնէր նունիկ տխուր և անհանգիստ:

— Յետոյ բան մը կ'ընենք, ջանիկս, այսպէս չի կըրնար մնալ...

Ու Սողոմոն, կնոջ գլուխը ձեռքերուն մէջ առած, հին օրերու օրօրներ կը հիւսէր քաղցր ու երկար...

## 7.

Երբ Սողոմոն չիլ հոգաբարձուին խանութը մտաւ, Վարդերես աղա կատաղի կոռուի մը բռնտւած էր հայ յաճախորդի մը հետ, որ քիչ առաջ գնած ձուկը առօք փառօք ետ վերադարձուցեր, դրամը ետ կ'ուզէր:

— Ծոծրակդ կը տեսնես դրամդ չես տեսներ, կը յոխորտար Վարդերես աղա, իր խօսքերու իրողութեան լիովին պիտակից:

— Աղաս, էֆէնտիս, ինչո՞ւ կը բարկանառ, ձուկդ հուտած է, ես ձուկը առի ուտելո՞ւ թէ հոտ քաշելու համար, իր անառարկելի իրաւունքները պաշտպանել կը կարծէր յաճախորդը և, կիսաւերակ գլխով ձուկի պաշէն բռնած, կը փորձէր հոգաբարձուին ձեռքը տալ կերպով մը:

Վարդերես աղա ինքնիրմէ ելած էլ ալ:

— Ծօ' ի՞նչ կ'ուզես ինէ... ինծի նայէ, ա՛ս վայրկեանիս ոսափիկան կը կանչեմ. . .

Ու Վարդերես աղա Աստծուն դիմելով համբերութիւն կը պաղատէր:

— Ստա՞կս կ'ուզեմ, ողորմութիւն չեմ ուզեր, Ոստիկա՞ն կը կանչես, կանչէ', կ'աղաչեմ. հոս քու Պոլիսը կը կարծես, Պոլիսն ու թուրքը մեռա՞ն...

Վարդերես աղա խոժոռ խոժոռ կը նայէր, յետոյ ծիծաղ մը կը պսոթկար:

— Փէ՛ք աղէկ, հոս Եւրոպա է, անանկ չէ՞:

— Եւրոպա՛ է:

— է՛, Եւրոպայի մէջ հոտա՞ծ ձուկ կը ծախեն:

— Ես ի՞նչ գիտնամ:

— Բանի որ չես գիտեր, նախ գնա սովորէ, յետոյ եկուր զրուցէ:

— Ես սովորելու պէտք չունիմ, աղա՛ս...

— Բարի՛, տգէտ մնացիր, տղա՛ս...

— էֆէնտի, աս ձուկը դուն չծախցի՞ր ինծի:

Վարդերես աղա դիւանագիտօրէն կը լոէր:

Յաճախորդը, յուսահատ, աչքը խանութիւն չորս կողմը կը դարձնէր վկայ մը արդարադատ մը, գէթ հաշտարար մը գտնելու համար և անոր հայեացքը խորունկ լաւատեսութեամբ մօրուեղ ու բարի, խոչոր աչքերով մարդ մը դիմամաւորեց երկարաւուն, նիհարկեկ, թուխ, նոյն ինքն Սողոմոն Ներկարարեան, որ վարէն վեր անկիւն մը պարզըւած, արձանացած, հազար անգամ կը գղջար անակնկալօրէն այսպէս տխուր տեսարան մը դիմաւորելուն համար:

— Կը ներէք, դուք ալ հայ էք կարծեմ, առանց այլեւայլի մայրենի բարբառով դիմեց յաճախորդը Սողոմոնին,

Այս' Սողոմոն հայ էր: Ի՞նչ կը հրամայէին:

Նախ քան յաճախորդը բերանը կը բանար, Վարդերես աղա, որ Սողոմոնի խանութ մուտքը վաղուց նկատած էր, բայց հոգաբարձական պաշտպանութեամբ չտեսնելու զարկած էր, հիմա, Սողոմոնի, իր տկար պաշտպանեալին մէջ իր լաւագոյն պաշտպանը գուշակելով՝ մէջքածալ խոնարհութեամբ մը ողջունեց զայն:

— Օ՛, բարե՛ւ, միւսի Սողոմոն, ի՞նչպէս եղաւ որ եկաք, Այս վայրկեանիս ձեզի թելեփոն պիտի ընէի, բայց շիտակը, այս... մարդը խանդարեց:

Ու կուտակուած ապրանքներուն մէջէն կերպով մը ճամբայ հարթելով, մօտեցաւ Սողոմոնին և իր իւղ, ձուկ, պանիր, քացախ, քարիւղ, սոխ ու սխտոր բուրող ձեռքերով ուժգնօրէն թափահարեց Սողոմոնի ձեռքը, երկարատեցնցումի մատնելով անոր վախ ուսերը:

Յաճախորդը պահ մը բերանը բաց պահելէ ետք, քառնի մը հարցումներով աննշան պաշտպանութիւն մը եւս փորձեց և հիմա Վարդերես աղայէն ոչ միայն դրամը, այլ և պատասխան մը իսկ չառնելով, ձուկը ցուցադրական եղանակով նետեց սեղանին ու անգործադրելի սպառնալիքներով նեռացաւ:

Վարդերես աղա մոայլ գէմք մը կեղծեց: Ան խորապէս վիրաւորուած էր: Վիրաւորուած էր ոչ թէ իբրև խանութպան: Բնա՛ւ և երբե՛ք: Ան վիրաւորուած էր, որ հայ մարդը ահա այս գնորդին պէս տգէտ և անկիրթ էր: Անոր սրտէն արիւն կ'երթար պարզապէս...

— Ահաւասիկ քեզի մեր հայերը, միւսի Սողոմոն: Ոչ բարով Եւրոպա եկած են, բայց նորէն նոյն աւանակն են, նոյն աւանակը: Տեսա՞ք, ես, ձեր բարի աչքերովը տեսաք, անանկ չէ՞: Միւսի Սողոմոն: Եւ տակաւին ես կ'առզիմ որ ձեզ նման բանիրուն ազգային մը ասոնց լակոտները կրթէ: Տակաւին գրպանէս զրա՛մ ալ տուած եմ, կու տամ և պիտի տամ այդ նպատակաւ... Ես կ'ուզեմ, բայց դուք մի՛ ուզէք, միւսի Սողոմոն, մեղք էք, ափսոս էք, ձեր բաղում գիտելեաց թանկագին գոհարները մի՛ թափէք

այս խողերուն առջև, էֆէնտիմ, հայը հայ չէ, վա՛յ է, վա՛յ... ըստ եմ ու կը կրկնեմ մինչեւ ի մահ... Աս ագու սատկելու, փճանալու, կոտորուելու ազդ է, ճանըմ, և սատկեցաւ եա՛, փճացաւ եա՛, կոտորուեցաւ եա՛...

Ու արդար յուզմունքէն քիթը խոնչելով Վարդերես աղա շիլ աչքը լարելով, Սողոմոնին յառելով և առողջ աչքը ճպճպացնելով՝ պատկառելի խոնարհութեամբ մը դիմաւորեց օտարական պատանի մը, որ հատ մը քաղցրաւենի կը յանձնարարէր և դրամը սեղանին նետելով կը հեռանար Վարդերես աղայի տասնեակ մը յարգանքները անուշադիր թողնելով:

Մերթ, գերագոյն հաճոյքով, յաճախորդները բաւարարելով, մերթ ալ, անհնարին զոհողութիւն բարբառող շեշտերով, ազգային խնդիրներ յուզելով, Վարդերես աղա ի մէջ այլոց, ահաւոր նորութիւններ հաղորդեց Սողոմոնին:

— Աշխարհի ամէն ծայրերէն ամէն տեսակ անօթիներ աղերսագիր դրկած են հոգաբարձութեանս և ուսուցիչ ըլլալ կ'ուզեն, միւսիւ Սողոմոն: Խա՛չ որ մեր ազգին այսքան լուսաւորեալ ըլլալը և այսքան ուսուցիչներ ունենալը չէի գիտեր: Ինչ որ է: Սակայն ճեր գրած աղերսագիրը է՛ն աղուարն էր, միւսիւ Սողոմոն: Իմ մասիս ես զո՞ն մնացի գո՞նէ: Ինչ որ է: Ես էն առաջը ըստ էի արդէն, հիմա ալ կ'ըսեմ, ով ալ կ'ուզէ թող աղաչէ, պաղատի, ոտքս պագնէ, միեւնոյն է, ես իմ քուէն քեզի՛ պիտի տամ: Իմ տուած խօսքս խօսք է: Արդէն ատիկա ամէնքն ալ գիտեն:

Յուսավառ Սողոմոնը պահ մը մեկուսի ծգած՝ լիտր մը քարիւղ ծախելէ ետք՝ Վարդերես աղա քրքջալով կը շարունակէր.

— Ան հոգաբարձու ըլլալիք թէողորոսը իր աներձագը կ'ուզէ տեղաւորել զպրոցիս մէջ: Սակայն, աս գործերը սուրբ են, ազգինն են, աս գործերուն մէջ խնամութիւն չ'ըլլար: Ինչ որ է: Եւ արդէն այդ աներձագն ո՞վ է որ, անոր բերնէն դեռ կաթնահոտ կու զայ: Անդրէան ալ ոտքը մէկ կօշիկին մէջ դրեր իր կուսակցական ընկերը կը ջատագովէ: Ազգիս պարձանքն է, կ'ըսէ: Գաղութիս համար պա-

տիւ մը պիտի ըլլայ զայն ուսուցչութեան կանչելը, կ'ըսէ: Սակայն ես ջուրը բո՛ւն աղբիւրէն խմած եմ, միւսիւ Սողոմոնն... Ես գիտեմ թէ անոր պարծանք համարածը տգէտին, ապուշին մէկն է: Եւ արդէն ատիկա իմ կարծիքս չէ միայն: Ամբողջ հայութիւնը գիտէ այդ մասին: Յետոյ, քեզի բան մը ըսեմ, միւսիւ Սողոմոն, ես չէզո՞ք մարդ եմ, կուսակցականներուն մերալի տուղներէն չեմ... Ինչ որ է:

— Համեցէք, շատ ընտիր տեսակէն է, համեղ և աժան, միայն երկու ֆրանք:

Կը դառնար Վարդերես աղա ներս մտնող յաճախորդի մը և քիչ առաջ ես բերուած հուած ձուկը ըստ կարելոյն մաքուր թուղթերու մէջ փաթթած կը վաճառէր, երկու ֆըրանք ցնծացնելով գանձանակին մէջ:

Յաղթական՝ Վարդերես աղա կը շարունակէր խօսիւ, խաղալով քիչ մը ապուշ կտրած Սողոմոնի գունաթափ վերարկուի կոճակներուն հետ:

— Հոգաբարձութիւնը աս մատս է: Ու Վարդերես աղա ցոյց կու տար շաբաթներու կեղսեր պահող իր ցուցամատը: Ա՛ս մատս: Աջ տնկեմ՝ հոգաբարձութիւնը աջ կ'երթայ: Ճախ տնկեմ՝ ձախ: Աս ասանկ է: Միւսիւ: Ինչ որ է: Իմ ընտրելիս դո՛ւք էք: ասիկա հրապարակաւ կը յայտարեմ: Ի՞նչ լնեմ: անգամ մը աչքս մտած էք, անգամ մը խօսք տուած եմ: Անցեալ օր ըսի ատ Անդրէաս և Թէոդորոս հոգաբարձու ըլլալիքներուն, իմ ուզածս չվարձէք նէ ես չկամ: հրաժարականս կը ներկայացնեմ... Աս սպառնալիքներուս դուք անշուշտ թափանցել չէք կրնար, քանզի նորեկ մըն էք, գաղութիս ներքին անցուղարձերը չիտէք... Սակայն Անդրէաս ու Թէոդորոս գիտեն թէ Վարդերես պարապ սպառնալիքներ տուղներէն չէ: Անոնք գիտեն թէ Վարդերես անգամ մը եթէ մատը շարժէ, ամբողջ գաղութիւն միաձայն կը զոայ... Աս ասանկ է, պարծենալու համար չէ, իրողաւթիւն է, միւսիւ: Ինչ որ է:

Ծիծաղկոտ յոյսն ու մելամաղձիկ յուսահասութիւնը Սողոմոնի մէջ իրար հերթ կու տային կ'առնէին շարունակ:

Եւ երբ հերթը վերջին անդամ յոյսին եկաւ, անքնական, վատառողջ ձայնով հարցուց.

— Յարգոյ Հոգաբարձութիւնդ արդեօք ե՞րբ նիստ պիտի գումարէ, խնդիրը վերջնականօրէն վճռելու համար:

Վարդերես աղա քիչ առաջուան զուարթութիւնը, բացս սրտութիւնը, մտերմութիւնը կարսնցուց կարծես. Ան պահ պահ մը լոեց, յետոյ զոյտ ուսերը բարձրացուց և իրենց նախկին տեղը բերաւ, ըստ երեւոյթին որոշեց պատասխանել, բայց առողջ աչքը իրար քով դրուած քարիւղի մեծ և փոքր թիթեղներաւն իյնալով, հարկ համարեց հառաչել միայն: Յետոյ, քիչ մը վարանոտ, մօտեցաւ քարիւղի մեծ թիթեղին, տնտեղց, աքտքալով բարձրացուց ու դիմեց Սողոմոնին:

— Կը հաճի՛ք այս փոքր թիթեղը բռնել, չըլլա՛յ թէ թափի, արիւնիս դինն է:

— Խնդրեմ:

Եւ Սողոմոն բոլոր ճիկերն ու զգուշութիւնները գործ դրաւ, որպէսզի քարիւղը չթափէր:

Քարիւղը չթափեցաւ, բայց մոայլը կը շարունակէր վարդերես աղայի դէմքին վրայ ճապղած մնալ:

— Նիստ կ'ըսէք, կրկին հառաչեց ան, ըստ երեւոյթին շատ զիւրին կը կարծէք: Հոգաբարձութիւնս, ինչպէս կը տեսնէք, յոյժ կարեւոր գործեր ունի: Նիստ ըսածնիդ ժամանակ կը խէ, յամանակ'... Իսկ ժամանակը ոսկի է, կ'ըսէք լուսանոգի հայրս: Ազգին և դպրոցին գործերն ալ կարեւոր են անշուշտ, բայց մենք ալ մեղք ենք, միւսիւ, տուն ունինք, ընտանիք ունինք, պարտքեր ունինք, զոհեր տուինք, ամէն բան կորսնցուցինք... Ինչ որ է: Բայց ինչո՞ւ կը շտապէք. կ'ընենք հարկաւ, այսօր վաղը ժողովք կ'ընենք...

Լուսաւոր մտքէ մը հրապուրուած, վարդերես աղա մօտեցաւ լուրիայի պարկին ու ճանկ մը լուրիա ափին մէջ առնելով յարեց.

— Բայց ի՞նչ աղուոր լուրիա է, գիտե՞ս, միւսիւ Սողոմոն, ի դէպ, գնումնիդ ո՞ւրկէ կ'ընէք: Կը տեսնէ՞ք ինչ

բան է ժամանակը: Քեզի այսքան կը սիրեմ, կը յարգեմ ալ, և սակայն ցարդ ժամանակ գտած չեմ հետաքրքրուելու ձեր որպիսութեամբը, ձեր ընտանեկան պարագաներովը: Կարծեօքս ամուսնացած էք և լսելովս շատ ուսեալ ու արժանաւոր, առաքինի կին մը ունիք և հրեշտակի պէս անուշիկ զաւակ մը: Ա՛խ, ա՛խ, ա՛խ, ե՞րբ պիտի երթանք Հայաստան, միւսիւ Սողոմոն: Խնդրեմ, մենք ա՛լ բարեկամներ ենք, խանութնիս սրտերնուս պէս բաց է ձեր առջեւ, Կ'ուղէի՞ք քիլո մ'երկու լուրիա կշռեմ ձեզ համար: Շատ ազնիւ ապրանք ըլլալուն համար միայն ձեզի կ'առաջարկեմ: Ձեր յարգելի տէկինը վառարանին վրայ գնելու ըլլայ նէ, անկիւնը թքնէ, տակաւին թուքը չչորցած լուրիան կ'եփէ: Պատուովս կ'երդնում: Ամբողջ պարկ մըն ալ դիմացի մատամը առաւ: Ինչ որ է: Ո՞րքան կշռեմ: Բարեկամական խորհուրդ կու տամ երկու քիլո առնել:

Ու, առանց այլեւայլի, Վարդերես աղա լուրիան կըշուց, Սողոմոնի ձեռքը տուաւ և գինը յայտարարեց որոշ ու հնչուն:

Սողոմոն պահ մը անակնկալի եկաւ: Դրամ չունէր, լուրիայի գինը ո՞ւրկէ վճարէր: Գայթակութիւն...

Ու, բնազորէն, սկսաւ որոնել բանկանակին, տափատին, ծոցին, վիրարկուն բոլոր գրապանները...

Այս մէկը կարծես դրամ էր: այսօ. ա՛խ, ո՛չ, տափատի կոճակն էր... Թէև գիտէր թէ վաղո՞ւց է որ դրամապանակ չունի, բայց հարկ համարեց ծոցի գրապանի դէզ մը թուղթերը գուրս հանել, անհանգստութեամբ քրքրել, վեր վար ընել ու զարմանալ, որ դրամը և գրամապանակը չի գտներ: Վերջը, ինքնապաշտպանութեան բնազուն մղուած, աւելի քան ճարտարութեամբ՝

— Ա՛հ, զրամապանակս, շշնջաց դողացող մատնիչ ձայնով:

Վարդերես աղա ամէն բան հասկցած թէն, բայց չկըրցաւ կարեկցութեան և անհանգստութեան տուրք մը չտալ:

— Կորսնցուցած չըլլա՞ք, միւսիւ Սողոմոն, Աստուած մի արասցէ...»

Ո՞չ, Սողոմոն հիմա լաւ կը յիշէր, առւնէն մեկնելու պահուն սեղանին վրայ դրաւ, բայց, խօսքի բռնուելով, մոռցաւ: Ներողութիւն:

Ու Սողոմոն անտեղի ծիծաղ մը փրցուց:

— Տուներնիդ շա՞տ հեռու է, միւսիւ:

— Տո՞ւնը, Այո՛, ո՛չ, այնքան ալ հեռու չէ:

— Անանկ է նէ անգամ մը տուներնիդ հանդիպեցէք. չըլլա՞յ թէ կորսնցուցած ըլլաք, ի սէր Աստուծոյ, ո՞րքան դրամ ունէիք դրամապանակնուդ մէջը:

— Բան մը չէ, հազար ֆրանք, մօտաւորապէս: Այո՛, մօտաւորապէս հազար ֆրանք:

— Օ՛, ատիկա խոշոր գումար է, միւսիւ Սողոմոն, վրայ բերաւ վարդերես աղա՝ ծիծաղելով և ծիծաղը մէկ հարուածով կասեցնելէ ետք, լրջօրէն թելազրեց.

— Տուներնիդ շատապեցէք, ստուգեցէ՞ք, ի սէր Աստուծոյ:

Ու լուրիան իր առջեւը քաշելով շարունակեց.

— Լուրիան ճամբու բեռ չըլլայ ձեղի, ես հոս կը պահմ ձեղ համար, հոգ մի՛ լնէք. միայն շատապեցէ՞ք, ի սէր Աստուծոյ, մի՛ կենաք:

Այո՛, լաւ կ'ըլլար որ Սողոմոն շատպէր և ստուգէր, ներողութիւն: Ծնորհակալութիւն: Ներողութիւն:

## 8.

Հիմա ազատ էր: Միակ մտահոգութիւնը դրամը չարել և լուրիան գնելն էր: Այլապէս ինչե՛ր կրնար մտածել յիւ հոգաբարձուն:

— Ծո, այդ ջէնէպէթը ես ուսուցի՛չ կը վարձեմ. լուրիան կը առ առաւաւ, խարեց թէ դրամապանակս տունը մոռցած եմ, գնաց ու ալ չեկաւ: Ծո ան որ ինծի խարեց, ա՞զ դը պիտի չխաբէ, Բնա՛ւ: Սատանան կը վարձեմ, կուսական կը վարձեմ, թէոդորոսին աներձագը կը վարձեմ,

սակայն աս Սողոմոն ուսուցի՛չ ըլլալիքը չեմ վարձեր ու չեմ վարձեր... Այդ խնդրոյն մէջ ես չկամ, հրաժարականս կը ներկայացնեմ: Մատս շարժեմ՝ ամբողջ զաղութը միաձայն կը դռայ...

Պարզ էր, պէտք էր դրամը ճարել և առաջին հերթին արդէն գնուած լուրիայի արժէքը վճարել:

Երկար, մեծ մասամբ անօգուտ թափառումներէ ետք, երբ քաղաքային ժամացոյցը արդէն 12ը կը զարնէր. Սողոմոն փոքրիկ հրապարակի մը անկիւնը կեցած կը մտածէր ու չէր կրնար վճռել:

— Մախի՞լ թէ չծախել սոսկի ժամացոյցը իր շղթայով:

Կասնզի ոչ ոք, ամբողջ քաղաքին մէջ պարզապէս ոչ ոք համաձայնած էր գրաւ առնել ժամացոյցն ու իր շղթան և փոխարէնը Սողոմոնի ուզած չափով դրամ տալ:

— Մենք այդքան ազատ դրամ չունինք, մեր դրամը գործածութեան մէջ է շարունակ, միւսիւ:

— Մենք սկզբունքով գրաւ չենք վերցներ:

— Դրաւ ոչ, բայց եթէ ծախելու ըլլաք՝ թերեւս բան մը տամ...

Պատասխանած էին տյո ու այն գոհարավաճառները, հետաքրքրուելով ոչ այնքան ժամացոյցով ու շղթայով. որքան զանոնք գրաւ դնել ուզող Սողոմոնի եռանկիւն մօրուքով, զունաթափ վերարկուով և գրեթէ անբարբառ լեզուով:

Նոյնիսկ ոմանք թափանցիկ ակնարկներով հասկցուցած էին թէ ժամացոյցն ու շղթան գողցուած ապրանք կրնային ըլլալ.

— Դուք օտարական էք, այնպէս չէ՞: Ու հաստատական կասկածներով գլուխնին օրորելով՝ ժամացոյցը ետ տըւած էին...

Ուրիշներ ալ, հակառակ Սողոմոնի բոլոր հնարաւոր բացարկութիւններուն, ոչ մէկ ձեւով կրցած էին հասկնալ թէ ո՞վ է վերջապէս այս անլեզու օտարականը, որ իրենց վաճառատուններուն առջև երկար ոլքատէ ետք, ամօթա-

պարտ, յանցաւոր շարժումներով և դատապարտեալի կիսաւ խեղդ ձայնով ժամացոյցը ձեռքը ներս կը մտնէր։ Ո՞վ էր։ Ո՞ր երկրէն, ինչո՞ւ կը ծախէր։ Ո՞ւր գնած էր։ Ի՞նչ աղգութեան կը պատկանէր։

— Ա՛խ, Արմէնիա, բացագանչած էր մէկը, արմէն, արմէնին, այնպէս չէ։ զիտեմ, որոնց թուրքերը միշտ կը կոտորեն, մի՛շտ, կարծեմ տարին անգամ մը։ Շատ հետաքրքրական է։ Բայց, ինչը ինչը, ինչո՞ւ կը կոտորեն, ես կարդացի թէ թուրքերը կը կոտորեն ձեղ, որովհետեւ ձեր հայրենակիցները զանոնք կողոպտած են։ Անշո՞ւշտ այդպէս ըլլալու է, այլապէս ինչո՞ւ պիտի կոտորէին։

Սողոմոնի հայրենասիրական արիւնը եռացած-եփուած էր, բայց աւա՛զ, բացարութիւններ տուող և հերքումներ ու պաշտպանութիւններ փորձող իր լեզուն միշտ դաւաճանած էր։ Ու Սողոմոն հազար անգամ ախտոսած էր, որ տեղական լեզուն չէր զիտեր։

Ամէն պարագայի տակ պարզ էր, որ այս վաճառականները, խելօք թէ յիմար, չէին ուզեր ժամացոյցն ու շըլթան վերցնել։ Արդ, հիմա ի՞նչ ընել։

— Ծախե՞լ թէ չծախել։

Անշո՞ւշտ չծախել, վասնզի նախ՝ Նունիկի համաձայնութիւնը չունէր։ Յանկարծ կրնար անտեղի վէճ ու խօսակցութիւն փրթիլ։ Սունց այն ալ Նունիկ ջղային կին էր ու տկար։ Երկրորդ՝ որքան ալ ծանր կարիքի մէջ, ամենայն դէպս ոսկի ժամացոյցն ու շղթան նուէր էր, յիշատակ, հանգուցեալ զոքանչէն մնացած։ Ամբողջ եօթը տարիներ, ամէն տեսակ փորձութիւններու դիման լով, աչքի լոյսի պէս պահած պահպանած էր, հիմա՞ պիտի ծախէր։

Եւ, վերջապէս, այս փնթի ու ժլատ վաճառականները, որոնք իրենց խարդախ ըլլալը հեռուէն կը պոռային, պարզ էր որ կէս, նոյնիսկ քառորդ գնոլ առնէին։ Յիմարութիւն, ի հարկէ՛, ինչո՞ւ ծախել, օրը ցերեկով ինչո՞ւ կողոպտուիլ։

Բայց այս վճիռը հազիւ իւրացուցած՝ այլ հոգաբարձուն աջէն կը չչնջար.

— Դրամնիդ գտա՞ք, միւսիւ Սողոմոն, լուբիան հո՛ս է...

Ու հոգաբարձուի շունչը դեռ չկտրած, ձախէն «Նորին Մեծութիւնը» կը խզիսգար.

— Պարոնը գիտէ՞ թէ որքան պարաք ունի...

Այո՛, այո՛, Սողոմոն գիտէր, 976 ֆր. և 45 ս։ Ու Սողոմոն կը խուճապէր փողցներն ի վեր, փողցներն ի վար, մերթ անցորդներուն զարնուելով, մերթ ինքնաշարժներու հեռաւոր տեսքէն ու աղմուկէն ահաբեկ՝ վերարկուին փէշերը քամիին տուած՝ քամիի պէս մայթէ մայթ շպրտուելով։

Ամբողջ այդ վաղքէն առաջ լուսաւոր միտք մը հրապուրած ու մտրակած էր զինքը։ Քանի որ պիտի ծախիմ փոխանակ օտարի՝ հարազատին կը ծախեմ։

Հարազատը հեռուէ հեռու ծանօթ հայ մըն էր։ Նախկին ազգային երեսփոխան, ձևարտութիւն թերթի նախկին խմբագիր, կոչումով իրաւագէտ և այժմ հայոց եկեղեցիին բակը մոմավաճառ ու «հին գոյքերու վաճառական» Մելքոն Արեւշատեան, որու խանութ-դրասենեակին առջև հիմա կանգ առած էր Սողոմոն։

Անսովոր համարձակութեամբ մը Սողոմոն ներս մտաւ խոնաւ, կարծես հեղծուցիչ գաղերով հոտաւէտուած խանութը, ուր մեծ սեղանի մը վրայ տեղաւորուած և ստքերը վար, օդին մէջ ճօճելով իր յօրանջը նոր կ'աւարտէր Մելքոն Արեւշատեան։ Ամէն չափի, զոյնի և մեծութեան մոմերու յատուկ բաժանմունքէն զատ, Մելքոնի խանութին ներսը ամէն ուղղութեամբ կը ցուցադրուէին արանց ու կանաց զգեստեղէններ, նախարարներու և կառապաններու յատուկ գլխարկներ, կօշիկներ, կաթսաներ, պղնձեղէններ, պնակներ, հեծանիւներ, ջութակներ, գրքեր, ձիու թամբեր, արդուկներ, հայելիներ, որոնցմէ սակայն ոչ մէկը, նոյնիսկ խանութին տէրը անմիջապէս չնկատուեցաւ ներս մտնող Սողոմոնէն, բացի այն երեք ինքնաեռները, մանաւանդ անոնցմէ ամէնէն պատիկը, որ տեսակ մը հանդիսաւորութեամբ սեղանի վրայ բազմած էր։

Ա՛խ, այդ ինքնաեռը, որ Սողոմոնի հայրենաբազծութեան կրակին վրայ միայն իւղ կը լեցնէր:

— Պիտի լսե՞ս, անգամ մըն ալ պիտի լսե՞ս, Սողոմոն, հոգեբուխ թշթոցը ինքնաեռի աստուածային երաժշառութեան, հայրենի կատորին տակ, ձիւնափայլ սփոսով սեղանին չուրջ, հարազատ կնոջը սպասարկութեամբ, իրիկնաժամին:

Կը շնջար ներքին ձայն մը Սողոմոնի ուղիղ կուրծքին տակ: Ու Սողոմոն նոյնիսկ փորձութիւնն ունեցաւ մտածելու՝

— Արդեօք թա՞նկ կ'արժեն.. . տեսնես ի՞նչ արժէ այդ ամէնէն պղտիկը, այդ դեղինը, այդ անպիտանը, որ կլօր փոր ունի... .

Յետոյ, ի՞նչ մեծ անակնկալ պիտի ըլլար նունիկի հասմար, եթէ Սողոմոն ծրարուած տունը տանէր ծիշտ այդ դեղին, պղտիկ ինքնաեռը և նունիկի անվերջ հետաքրքրութեամբ վառուած հարցումներուն սուտ ու սխալ պատասխաններ տար նախ, ապա, ամէնէն վերջը, կամաց ու զգոյշ, ծրարը քանդէր:

— Սամովա՞ր.. . Սողիկ ջան, պիտի լսէր անակնկալի եկած և ուղղակի խենթեցած նունիկի հիացիկ բացագանչութիւնը.. .

Կեանքը, երջանկութիւնը, բոլո՞ր ձախորդութիւններու արհամարհանքը նունիկի այդ մէկ հատիկ բացագանչութեան մէջ չէ՞ արդէն.. .

Ու Սողոմոն, իրա՞ւ, այնքան յուզուած էր ինքնաեռի առթած երանութեամբ, որ Մելքոնի ոտքի ցատկումին, երկվեցեակ մը ողջոյններուն և միանուագ հարցումներուն պատասխանեց վարդագոյն հրճուանքով.

Որպիսութիւնը՝ լաւ էր, չնորհակալ էր: Օդերը՝ այս', ցրաած էին, բայց ոչինչ: Ազգային գործերը աղէկ են, կը քալեն: Բազաքական նորութիւններ չկան, եղածները աննշան են: Մեր փոքրիկ Հայաստանը՝ կ'երթանք, հարկա՛ւ, որ մը:

Սակայն սպասածէն աւելի շուտ հարցումները հասանցուրտ իրականութեան:

Միւսիւ Սողոմոն ի՞նչ կը հրամայէր, ի՞նչով կրնային ծառայել իրեն: Այս որքա՞ն ատեն եղաւ այցելած չէր իր հաւատարիմ բարեկամ Մելքոնին, որտւն գործերը հիմա գէշ նա, շատ գէշ: Առեւտուրը կեցած է, կեանքը, ինչպէս Սողոմոնն ալ գիտէ, կը սղէ օրէ օր: Գիները ժամը ժամին վըրայ կը դնեն: Հայրենակիցները օտար խանութներէ գընումներ կ'ընեն: Հայոց եկեղեցին մէջ վառուելու մոմը նոյնիսկ օտարներէ կը գնեն: Այս', մեր ազգը պիտի կործանուի իր օտարամոլութեամբը: Մելքոն այդ կարծիքէն էր երէկ, երբ ազգային երեսփոխան էր ձևացուրեան խմբագիր, նոյն կարծիքն ունի այսօր և պիտի ունենայ վաղնալ: Յաճախ, շատ յաճախ այդ օտարամոլութեան առաջքնամար խորհած էր լուսանոգի Զահրապին, Զաւարեանին հետ: Տակաւին անցեալ օր ալ նամակ գրեց Կիլիկիոյ Կաթողիկոսին:

Հակառակ Մելքոնի այս մտերմիկ բացատրութեան, Սողոմոն կը դժուարանար ժամացոյցը ծախելու խօսքը բանալ:

— Տակաւին ժամանակ շատ կայ:

— Որքան ուշ այնքան լաւ:

— Ի՞նչպէս կարելի է փոխանակ դրամ տալով բան մը գնելու, բան մը ծախել և դրամ առնել.. .

— Թող գոնէ յարմար պատեհութիւն մը ներկայանայ:

Փոխն ի փոխ կը խորհէր Սողոմոն և կացութիւնը փըրկելու համար, հարցուց.

— Այս պղտիկ ինքնաեռը ծախու է, այնպէս չէ՞.. .

— Ի՞նչպէս, ինքնաե՞որ, այս աղոտորի՞կը: Կը փափաքէիք գնե՞լ: Բայց մեղքու ձենէ ինչ պահեմ, միւսիւ Սողոմոն, փափաքս է չծախել, քանզի ատիկա ինքնաեռ մը չէ իրապիս, այլ հրաշակերտ մը: Փոքրիկ պատմութիւն մը, եթէ կը համբար, միւսիւ Սողոմոն, այս ինքնաեռին վրայ, զոր այնքան հաւնեցաք և զոր, զիտեմ, ուժո՛վ պիտի գնէք, եթէ յամառիմ ու չյօժարիմ ծախել: Այս հրաշակերտը Մոս-

կուայէն իր հետը բերած էր ոռւս իշխան մը, ան, որու մասին անցեալ օր թերթերը գումացին թէ սև յուսահասութեան մը վայրկեանին ձեղունէն ինքզինքը կախած է... Ահաւասիկ այդ ազնիւ իշխանին ինքնաեռն է տարկա: Ասկէ միայն շաբաթ մը առաջ անձամբ բերաւ ինծի: Հայ ըլլալս գիտէր, անունիս ալ ծանօթ էր, լսած էր, գիտէր: Տեսնալու էիք զինքը, միւսիւ Սողոմոն, իսկակա՞ն իշխան մը, ցար... Եւ որքա՞ն հայասէր: Դուք, միւսիւ Սողոմոն, անշուշտ աւելի քաջածանօթ էք Ռուսիոյ մայրաքաղաք Մոսկուայի հրդեհի մանրամասնութիւններուն:

Ո՞չ, Սողոմոն չէր զիտեր, ի՞նչ հրդեհ, Մոսկուայի մէջ կարեւոր հրդեհներ պատահած են միթէ...

Ու Սողոմոն ապուշ կտրեցաւ, երբ Մելքոն դար մը առաջ տեղի ունեցած հրդեհի մասին մկան խօսիլ:

— Բաածս ա՞ն է, թէ այս աղուորիկ ինքնաեռը Նափոլէոնի պատմական յախուռն և անմիտ արշաւանքին մէկ տարօրինակի յիշատակը կը պահէ: Այս հրաշակերաը Մոսկուայի համայնակուլ հրդեհին բոցերէն փրկած ազատած է լուսահոգի ոռւս իշխանին հայ սպասուհին, մազ մնալով որ կեանքն ալ վրայ տայ: Ասիլտ նոյնութեամբ պատմեց ինծի լուսահոգի իշխանը և հայ ըլլալուս համար ձեռքս սեղմեց: Արդ, հիմա կը տեսնէ՞ք թէ ի՞նչ ընտիր ճաշակ ունիք, միւսիւ Սողոմոն, և ի՞նչ խորաթափանց հայեացքով կրցաք անմիջապէս ըմբռնել այս ինքնաեռին պատմական հրաշակերտ մը ըլլալը...

Սողոմոնի կացութիւնը աւելի քան փափուկ դարձաւ: Քիչ մնաց հարցնէր.

— Ի՞նչ պիտի վճարեմ:

Բայց գրպանի բացարձակ ամայութեան, լուրիայի, «Նորին Մեծութեան» պարտքի սարսափները ոչ միայն այդ չարագուշակ հարցումը Սողոմոնի շրթունքներուն վրայ չըերին, այլ և անոր գրպանէն, կամացուկ մը հանել տուին ոսկի ժամացոյցն ու շղթան:

— Ի դէպ, պարսն Մելքոն, ես կ'ուզէի ձեր կարծիքը

հարցնել: Այս ոսկի ժամացոյցն ու շղթան արդեօք բան մը կ'արժի՞ն...

Մելքոն յանկարծակիի եկաւ:  
— Ե՞րբ զնեցիք, ո՞ւր գնեցիք, քանի՞վ գնեցիք:  
հարցուց արագ արագ, խորին զննութեան ենթարկելով ժամացոյցը:

Սողոմոն չէր գնած. ծախել կ'ուզէր:  
— Ա՞խ ծախե՞լ կ'ուզէք: Նուասսա ոսկիի գործէն աղէկ չի հասկնար: Սակայն ոսկի չէ, անանկ չէ:  
— Ինչպէ՞ս թէ ոսկի չէ, հին օրերու պէս ծիծաղեցաւ Սողոմոն:

— Անանկ է նէ ոսկի է: Սակայն, ինչո՞ւ կը ծախէք, միւսիւ Սողոմոն:

Սողոմոն դժուարացաւ անմիջական պատասխան մը գտնել:

Ոչի՞նչ: Այնպէս միայն: Քիչ մը դրամի պէտք ունէր վերջերս, անակնկալօրէն: Պիտի զրկէր կովկաս, իր աղպականներէն մէկուն: Յետոյ, ժամացոյցը իր մէկ ծանօթինն էր, որ ինդրած էր իրմէ ծախել...

Մելքոն փառաւորապէս հասկցաւ ժամացոյցի ամբողջ գաղանիքը:

— Այս միամիտ ոչխարը իր սեփական ժամացոյցը ծախելէ անգամ կը վախնայ, կ'ամշնայ, խորհեցաւ Մելքոն և անմիջապէս վրայ տուաւ հիացիկ:

— Ուրեմն բարեկործական նպատակաւ ծախել կուզէք: Կեցցէ՞ք, բարեկամս: Ի՞նչ կ'արժէ, կ'ըսէք: Բատ իսշատ թանկագին բան է: Հարիւր ֆրանք մը կ'արժէ, անանկ չէ:

Հարիւր ֆրանք: Սողոմոն հինգ հարիւր ֆրանքը ժամացոյցի կէս զինը կը համարէր միայն...

Սողոմոնի կամքէն բալորովին անկախ, մտերիմ խօսակցութիւնը սակարկութեան վերածուցաւ: իսկ սակարկութիւնը անաւոր չափերով երկարատեև եղաւ, ամօթ, զղջում, բարկութիւն, տառապանք պատճառելով Սողոմոնին:

Մելքոն յանուն բարեկամութեան հարիւրին վրայ յի-

սուն ֆրանք բարձրացաւ։ Սողոմոն հազարէն հարիւր իջաւ։ Սողոմոն հարիւր ալ իջաւ, Մելքոն յիսունի վրայ մնաց տակաւին։ Սողոմոն վճռեց չծախել։ Մելքոն կտրուկ կերպով յայտարարեց թէ պէտք չունի, գուցէ ոսկի չէր, գոհար էր, բայց պէտք չունէր։ Սողոմոն վախցաւ, հարիւր ֆրանք ալ իջաւ։ Մելքոն թէկ լացակամած, բայց յանուն հայրենակցական նուրիական կապին՝ յիսուն ֆրանք ալ աւելցուց և անմիջապէս դառնօրէն զղացողի արտայայտութիւն ստացաւ։ Սողոմոն լրջօրէն բարկացաւ և ամբողջ վայրկեաններ քէն ըրած տղու պէս լուռ մնաց։ Մելքոնի լոութիւնը աւելի երկարատև եղաւ։ Սողոմոն վերջին անգամ ըլլալով փափաքեցաւ հինգ հարիւր ֆրանքով ծախել։ Մելքոն անկարելի, անըմբանելի, անխոստովանելի գումար հոչակեց հինգ հարիւր ֆրանք։

Կարճատես գժտութենէ մը ետք Մելքոն կրկին սիրաւիր եղաւ։

— Ինդիրը բոլորովին կը փոխուի, եթէ փոխանակութիւն մը ընենք։

— ?

— Ինքնաեռը գնել կը փափաքէիք, անանկ չէ<sup>o</sup>. բընա՛ւ պիտի չուզէի ծախել, բայց քանի որ ինդիրը անգամ մը հոս եկած է, յամացոյցնիդ կ'առնեմ, ինքնաեռը կուտամ։ Պիտի ըսէք հապա շղթա՞ն։ Իրաւո՞ւնք ունիք։ Շըլթան ձեզի կը թողում . . . Կամ, քանի որ ան ալ ծախել կ'ուզէք անպատճառ, սիրտերնիդ չեմ կոտրեր և բարեկամութիւննիս չեմ խզեր, հարիւր ֆրանք ալ շղթային կուտամ . . . Ի՞նչ ընեմ, կ'ըսէք դրամի պէտք ունիմ . . .

Սողոմոն հաստատակամօրէն հումանայն չէր։

— Անանկ է նէ դուք գիտէք։

Թէկ ծայրայեղօրէն յուսահատ՝ Սողոմոն վճռականօրէն հեռանալ ուզեց։

— Բարկացա՞ք, միւսիւ, խա՛չ որ չէի սպասեր,

Ո՛չ, Սողոմոն բարկացած չէր։ Խնդրեմ, ինչո՞ւ բարկանար։ Ան միայն կը չպատէր։ Մասնաւոր, զեռ չկատարած գործեր ունէր։ Ատո՞ր համար կը շտապէր։

— Ուրեմն հինգ հարիւր ֆրանք կ'ըսէք . . . բայց աւտիկա անկարելի, անըլք բոնելի, անխոստովանելի գումար թըն է, ըսի, պատուովս կ'երդնում . . .

Սողոմոնի աջ ոտքը արդէն խանութէն դուրս ինկածէր, երբ Մելքոնի ձեռքը իջաւ անոր ուսին։

— Ո՛չ, պիտի չգեմ որ երթաք . . . Զեղ նման թանկապին բարեկամ մը վշտացնելը ման է ինձ համար։ Սպասեցէք։ հինգ հարիւր ֆրանք կը խնդրէք։ Հազար, հինգ հազար ֆրանք, ամբողջ զրամենեակս կու տամ, միայն մի վշտանաք ինծի, կ'աղաչեմ . . .

Սողոմոնի աջ ոտքը ձախին կը հետեւէր և ետ, խանութը կը դառնար։

Մելքոն կրկին ու կրկին կը զննէր ժամացոյցը, ամբողջ կէս ժամ կը խօսէր սիրոյ և առեւտուրի, ազգի և ժամացոյցի մասին և վերջապէս գզրոցէն կը հանէր 450 ֆըրանք, Սողոմոնին կու տար և կ'ըսէր։

— Ա՛լ ներողամիտ եղէք, կ'աղաչեմ . . .

Արդարեւ, Սողոմոն բացի ներողամիտ ըլլալէ, պարզապէս ուրիշ ընկելիք չունէր։ Ուստի չնորհակալութիւններ կը յայտնէր և երբ խանութէն դուրս կու գար, չէր գիտեր ուրա՞խ էր թէ ախուր . . .

Բայց վճռապէս ուրախ էր, երբ ուշ ատեն տուն վերաբաժան երկու քիլո լուրիսայի գինը վճարած և «Նորին Մեծութեան» պարտքի կարեւոր մէկ մասը փակած՝ առանց առանձնապէս ցնցող զայթակղութեան։ Տանը ուրախութիւնը կատարեալ տօնի և ցնծութեան վերածուեցաւ, երբ նունիկ աւետեց թէ։

— Առողիկը առաջին ատամը հանած է . . .

— Աստուած՝ իմ, մի՞թէ, ձի՞շտ, իսկապէ՞ս, տեսնե՞մ, տեսնե՞մ . . .

9.

Շաբաթ մը ետք նունիկի բոլոր յուետես կատածները ջարդ ու փշուր ըլլալով, քամին կը տրաւէին անհետ ու

ձղած և առջեւէն սեւցած ու ետեւէն սպիտակած կիսակօշիկ-ներուն մէջ։ Ոչի՞նչ։ Ամօ՛թ էր հանրային գործիչի մը հա-մար հագուստ կապուստի մասին երկար բարակ մտածել, կը խորհիք Սողոմոն ու կը դառնար նունիկի.

— Յիշէ՛ Զաւարեանը, սիրելիս...

Բայց անմիջապէս յիշելով նունիկ առնուազն նոր վե-րարկուի մը պէտք ունի, գէթ գպրոցական հանդէսներուն դուրս գալու համար, կը գլջար, կը խղճահարէր։ Սակայն, զարգանալի՛ բան է յոյսը։ Սողոմոն անմիջապէս կը յիշէր թէ նոր Տարին մօտ է և հարիւրին հարիւր հաւանականու-թիւն կայ կանխավճար ստանալու։ Ուրեմն պարզ է որ նունիկ նոր վերարկու կ'ունենայ...

Տունէն դպրոց և դպրոցէն տուն վագելով, Սողոմոն ինք ալ կը զարմանար յաճախ։

— Այլեւս նախկին ծոյլը, ծերը, մոռացկոտը, մելա-մաղձոտը, ամօթխածը, կասկածամիտը չեմ, գրեթէ բար-ձրածայն կը մտմտար ան ու մէկիկ մէկիկ կը թուէր իր վերանորոգուող հոգեկան ուժերը։ Նոյնիսկ անքնութեան, ստամոքսի պարբերական խանգարման, յօդացաւի դէմ զոր-ծածելի գեղերն ու միջոցները մէկդի նետած էր։ Աւելի քիչ կը ծխէր, աւելի շատ կը ծիծաղէր։ քնացած ատեն ոչ բարձրածայն կը խօսէր, ոչ ալ ցեխերու մէջ կ'իյնար։ Ցե-րեկները արթուն, կարգար թէ գրէր, հրաշալիօրէն կը հասկնար ամէն բան ու երբե՛ք իր կամքէն անկախ չէր հառաջեր։

— Ճիշտ է, պարտքերու տակ էր նորէն, բայց տան-տիրոջ, նորին մեծութեան և ամէն տեսակ նախկին պար-տատէրներու հանդիպած պահերուն կրնար հայեացքը ուզիղ պահել, ակամայ ժպիտներ չշինել, քիչ մը աւելի բարձր, գրեթէ անսխալ խօսիլ տեղական լեզուն...

Նունիկն այլեւս հաղուադէպօրէն կը հառաջէր։ Սու-րիկ կարծես նախկին լալկանը չէր։ Այս երկիրը հաճելի բնութիւն ունէր հիմա Սողոմոնի համար։ Մշուշը առաջուան պէս անտանելի չէր։

— Մի մոռանար, սիրելիս, որ ձմեռը ձմեռ է ամէն

անվերադարձ։ իսկ Սողոմոնի աւանդական լաւատեսութիւ-նը վերջնականապէս կը յաղթանակէր։

— Հիմա տեսա՞ր, նունիկ...

Արդառե, նունիկ պարտուած էր և Սողոմոն ուսուցիչ վարձուած։ Վերջապէս ճիշտ է, շատ մը ըսի ըսաւներ հ-ղած էին, հոգաբարձութիւնը միաձայն չէր իր վճիռին մէջ։ անկիւնէ անկիւն և սրճարանէ սրճարան սպառնացողներ կային, ոմանք իրենց զաւակները դպրոցէն կը հանէին ցուցարարական խրոխաւ կեցուածքով, ուրիշներ վերջնակա-նապէս կը յուսահասէին ազգէն ու դպրոցէն և օտարները կը նախընտրէին, պայքարի և բոյկոտի բոյր կար մթնո-լորտին մէջ, նոյնիսկ երկրորդ հայկական դպրոց մը բանա-լու ստիպողական ծրագիրներ, բայց, ի վերջոյ, նման պըզ-ափիկ հնանուքներ ամէն դպրոցի և ամէն ուսուցիչէ համար էին և Սողոմոն կը միամտուէր որ ինք բացառութիւն մը չէ։

Անկարեւոր չէր նաև ոռճիկը։ Հինգ հարիւր ֆրանք։ ճիշտ է, պիտի չկրնային ծայրը ծայրին հասցնել, պարտ-քերը պիտի դիզուէին կրկին։ Թերեւս շարունակէին կիսա-մերկ մնալ, բայց...

— Բան մըն է նորէն, նունիկ'կ... կը դիմանանք, դուն հոգ մի ըներ... կը գոտեպնդէր Սողոմոն։

Աւելորդ էր սակայն այս քաջալերանքը, վասնզի նու-նիկն անգամ հիմա փառաւորապէս գիտէր թէ եղածը չեղա-ծէն լաւ է...։

— Յետոյ, ազատ ժամերս, տօները, արձակուրդները եւայլն, կը յատկացնեմ գրական աշխատանքներու։ Ինչ կ'ուզես ըսէ, վարձատրող թերթ մը, հրատարակչական մը կը ճարեմ, կը պայցառանար Սողոմոն և թէյին հետ ցածաք հաց կրծելով առտուն կանուխ կը շատպէր դպրոց, իր նը-ւիրական պարտականութեան գլուխը։

Սողոմոնի ոտքերը հիմա առանձին, նոյնիսկ հաճելի աղմուկով կը հնչէին փողոցի մայթերուն։ տան և դպրոցի սանդուխներուն վրայ, թէև, իրապէս, անոնք կը շարու-նակուէին սեղմուէիլ նախկին հին, ծոմուած, դեղին գոյնը

տեղ, հիմա մեզ մօտ ալ արեւ չկայ, կը պաշտպանուէր Սոզոմոն, երբ Նունիկ օքերով կուտակուած և ցրուելու անտրամադիր մշուշը տեսնելով՝ ուղղակի ջղային գալարումներ կ'ունենար:

Լսելով կամ կարդալով դպրոցի, ուսուցչութեան, Հոգաբարձութեան, եկեղեցիի, նախկին և ապագայ ընտրութիւններու, ազգային-հասարակական կարեւոր խնդիրներու շուրջը մզուող վէճերու և պայքարներու մասին, Նունիկ՝ կ'անհանգստանար.

— Ի՞նչ կ'ուզեն այս մարդիկ, Աստուած իմ, և ո՞ւր է այս բոլորին վախճանը, կը մտածէր ան յաճախ ու երբեմն ալ, ինքինը զսպելու անզօր, մինակ զգալով, կը դիմէր Սողոմոնի օգնութեան.

— Դէժ քե՛զ բան մը չպատահի, Աստուած իմ...

— Ի՞նչ, Սողոմոնի՞ն: Երախտօյ ևս, Նունիկ... կը գօտեանդէր Սողոմոն:

Արդարեւ: Դպրոցի մանուկները ուղղակի կը պաշտէին Սողոմոնը: Ուսուցիչները առնուազն կը սիրէին: Գաղութի մազին կպած չէր: Այսպէս կամ այնպէս գիտակից երիտասարդութիւն մը կար, որ կը ճանչնար ու կը զնահասէր զինքը իրեւ հեղինակ, իրբեւ մտքի մշակ: Շիրի նման ամենի պաշտպան հոգաբարձու ունէր: Մելքոնի նման բարեկամ մը: Իրեւ պատրաստուած, փորձառու, բարեխիղճ ուսուցիչ-մանկավարժ՝ ուղղակի բացառիկ էր: Իսկ իրբեւ գրչի մարդ՝ հազար գլխով բարձր ի շրջապատէն: Նունիկ ինչո՞ւ կ'անհանգստանար:

— Խօսքը մէջերնիս, դուն ալ վախկոտ գուրս եկար, Նունիկ, ժամելով կը յեղալրէր Սողոմոն, ու կը պատամէր դպրոցի համելի, ամենօրեայ մանրավեպերով լի դասերէն, չարածձի, ուղղակի հրեշտակային աշակերտներէն, դող տընտեսէն և աշխարհագրութեան յիմար ուսուցիչէն, որ յամառէն պնդած էր թէ Կիլիկիան Վիլտոնի գծած սահմաններուն մէջ կը գտնուի:

— Յիմարը յիմար է, բայց, ոչինչ, հայրենասէր է, կը յարէր Սողոմոն:

Ապա Նունիկին կը պատմէր իր խոշոր խոշոր ծրագիրներու մասին, որոնցմէ ոմանց արդէն իսկ նախաձեռնած էր անձամբ:

— Կը մնայ հասարակական դասախոսութիւններ կազմակերպիլ գաղութին համար, Նունիկ, ոգեւորութեան բարձրագոյն կէտին հասած կը ճառէր Սողոմոն: Հապա այն մատղաչ, յուսատու գրիչները, դորս պէտք է խրախուսել, զեկավարել, գրական շաբաթներով: Մի՞թէ անհրաժեշտ չէ հիմնել գիշերային դասընթացքներ՝ կիսագրագէտ և անգրագէտ բանուորներու, արհեստաւորներու համար: Դուն եթէ ծոյլ չըլլաս, Նունիկ, Կանանց Միութիւն մը կը կազմակերպես, ինչպէս նաև Կարմիր Խաչ մը: Գիտես, որ հոգով սրտով պիտի աջակցիմ քեզի: այդ կրթութիւնդ, զարգացումդ ո՞ր օրուան համար է, Նունիկ: Օ՛, կինե՛ր, կինե՛ր, աշխարհի և մարդկութեան բախտը ձեր ձեռքն է... Յետոյ, սիրելիս, միացեալ ճակատով պայքար պէտք է մղել ձուլման և ապազգայնացման դէմ: Հիմը թող այս գաղութէն սկսի: Գրադարանը արդէն բացինք: Կը մնայ Հայկական Ակումբը: Զե՞ս կարծեր որ կարելի է որբանոց մըն ալ հիմնել: Հարիւրին հարիւր վսահ եմ թէ դպրոցը առաջիկայ տարին գիմնազիոնի աստիճանին պիտի հասցնեմ: Էն վերջը, Նունիկ, բոլորովին անհաւանական չէ որ Հրատարակչական մըն ալ հիմնենք...

Պնակ մը գրեթէ սառած բայց միշտ սիրելի բորչը արագ արագ խմելէ և մէջի ագռաւի գլուխի չափ կասկածելի միսը աղի և սոխի աջակցութեամբ ուտելէ ետք. Սողոմոն քաղցրօրէն կը յուզուէր, երբ Նունիկ կ'ըսէր.

— Դէ՛, հիմա դէժ քանի մը բոպէով պառկէ, հանգստացիր:

Բացառաբար, բայց ժպտօրէն, Սողոմոն, զլուխն օրօրելով, ճաշասեղանին վրայ տեղ կը բանար, դպրոցէն հետը բերած յիսունի չափ տեսրակներ նայելու, սրբագրելու համար. կամ կը ձեռնարկէր Հայաստանի քարտէսի գծադրութեան՝ աշխարհագրութեան ուսուցիչին իննդրանքը բաւարարելով:

— Օ՛, արդէն մութ է, կ'անհանգստանար Սողոմոն  
և ոտքի կը ցատկէր:

Պէտք էր վաղել ծնողական ժողովին: Հաւանաբար ա-  
շակերտներու ծնողները այս անգամ եկած ըլլային. չէ՞ որ  
երրորդ անգամ ըլլալով ժողովը յետաձգուած էր, ծնողներու  
ինը տասներորդի բացակայութեան պատճառով: Անկէ հաք  
պիտի անցնէր շիլ հոգաբարձուին մօտ՝ ստուգելու թէ կի-  
րակի, ժամերգութենէն վերջ. Հոգաբարձութիւնը նիստ պի-  
տի զումարէ՞ր, եթէ այս, արձանադրութիւնը պատրաստէր,  
շիլի հաշիւները կազմէր, հաշուեկչիոը սարքէր, նամակները  
դրէր:

Վերադարձին, քիչ մը անձկութեամբ, Սողոմոն Նու-  
նիկի կը պատմէր թէ դպրոցին ի նպաստ տրուած ներկա-  
յացումը հազիւ ծախսերը գոցած է, եթէ բան մըն ալ մնայ,  
այն ալ ապառիկ է, հազիւ գանձուի. իսկ նախաձենուած  
հանգանակութիւնը ինչ ինչ պատճառներով վիժած է: Յե-  
տոյ, անցեալ կիրակի եկեղեցիին մէջ շիլին հետ պատցու-  
ցած պնակէն հազիւ քանի մը հարիւր ֆրանք հաւաքուած  
էր, այն ալ անպիտանը եկեղեցիի պայծառութեան կ'ուղէ  
յատկացնել:

— Այնպէս որ, Նունիկ, այս և անցեալ ամիսներու  
ոռձիկը հաւանաբար քիչ մը ուշ ստանանք... .

Նունիկ այդպէս ալ գիտէր:

— Այդ ոչինչ, ի ոէր Աստուծոյ: Միայն թէ Սողոմոն  
թող զգոյշ ըլլար, այդ շիլ կրնար զանազան խաղեր խա-  
ղաւ:

— Զարմանալի՞ մարդ ես, Նունիկ, ի՞նչ խաղ...

ի՞նչ, Նունիկ ինչ զիտնար: Երբ խանութպանը հան-  
րային գործի մը գանձապահ է, պէտք է զգոյշ ըլլաւ...

— Այսի՞նքն, չեմ հասկնար, Նունիկ:

— Զհասկնալու ոչինչ կայ, կը զգայնանար Նունիկ:  
Այդ մարդը կրնայ դրամները խորել և որովհետեւ հոգաբար-  
ձութեան քարտուղար հաշուակալը գուն ես իբր թէ, օր մը,  
անակնկալորէն, պոչ մը կը կպցնեն ետեւէդ...

Սողոմոն, ձիշտն ըսած, խորհած չէր այդ մասին: Հի-

մա ան, պահ մը, նոյնիսկ անհաւանական չգտաւ Նունիկի  
չարագուշակ կասկածները, բայց ներքին մարդը, — բա-  
րին, արդարամիտը և մարդասէրը — յաղթանակեց նորէն:

— Կը սխալիս, Նունիկ, ըսաւ Սողոմոն գլուխն օրո-  
րելով. նախ՝ շիլ կարծածդ մարդերէն չէ, յետոյ, եթէ ու-  
զէ աւ, չի կրնար. բոլոր հաշիւները ձեռքս են, Նունիկ:

— Հաշիւները, բայց ո՞չ զրամը:

— Միեւնոյն է, չի կրնար ըլլալ. դրամն ու հաշիւը  
իրար պիտի բոնե՞ն թէ ոչ, այլապէս ի՞նչպէս... զարմա-  
նալի՞ մարդ ես: Եւ վերջապէս շիլը քու կարծածներէն  
չէ...

— Աստուծած քեզ հետ, ես իմս ըսի, պատասխանեց  
Նունիկ, Սողոմոնէն վերջնապէս յուսահատած:

## 10.

Օրեր ետք, Սողոմոն հազուադէպօրէն ազատ վայրկեան-  
ներ զտած, գոն ու երջանիկ, Սուրբիկ օրօրոցին կրթնած,  
հազար ու հազար գովք կը հիւսէր, երբ Նունիկ կապոց մը  
արտասահմանեան թերթերով ներս մտաւ:

Սողոմոնի աչքերը փայլեցան: Վաղուց աչք զոցելու  
ժամանակ չունենալով, թերթ չէր կարդացեր:

— Բն' ը տեսնենք, Նունիկ, ըսաւ և ոտքի ցատկեց:  
Բոլորովին տգէտանակեակ մնացինք արտաքին աշխար-  
հէն, թերթերուն նոյնիսկ կանոնաւորաբար չենք կրնար  
հետեւիլ...

Ու Նունիկի ձեռքէն թերթերը խլելով մահակալին  
վրայ ինկաւ: Զարմացա՞ւ: Ո՞վ և ինչո՞ւ զրկեց իրեն այս  
թերթը, որուն անունը և համբաւը միայն լսած էր ցարդ:  
Մակայն, իսկոյն հանգարտեցաւ: Ո՞վ գիտէ, զուցէ խմբա-  
գրութիւնը յարդանքի փոքրիկ արտայատութիւն մը ըրած  
էր իր ժողովուրդի մտքի մէկ համեստ մշակին: Զուարթա-  
ցաւ:

Քիչ ետք թերթի տառերն ու տողերը Սողոմոնի ապուշ  
կտրած աչքերուն տակէն խոյս կու տային և Սուրբիկի մեր-

ձակայ լացը կը թուէր լսուած հեռաւոր անդունդէ մը:  
Սողոմոն, արթուն տեղով, կեցած էր ա՛յդ իսկ անդուն-  
դին ծայրը՝ պատրաստ առաջին վայրկեանին գահավիժելու,  
բայց փա՛ռք Աստուծոյ, Նունիկ հազաց չոր, տառապագին  
ու բարձր և Սողոմոն ընդուռ արթնցաւ կարծես, ձեռքը  
աղմուկով ծունկին զարկաւ ու ամենի, երկա՛ր տարիներ իր-  
մէ չլսուած հուժկու աղաղակով մը, լիսբերան հայհոյեց...

— Վա՛յ, սրիկա՛յ... այսքա՞ն ալ սուտ, այսքա՞ն ալ  
զրպարտութիւն...

Նունիկ յանկարծակիի եկաւ. ի՞նչ էր պատահեր...

Եւ սուր, թունաւոր նախազգացում մը, կարծես մէկ  
անգամէն հազարաւոր ասեղներ զարկաւ իր հիւանդ, արդէն  
քայքայուած մարմինին:

— Ի՞նչ կայ, ի՞նչ կարդացիր, հարցուց:

— Ոչի՞նչ, Նունիկ, ոչի՞նչ, քեզ չի վերտքերիր:

Սողոմոնի այս հանգստացուցիչ կոչը բաւական էր, որ-  
պէսզի Նունիկի անհանգստութիւնը կրկնապատկուէր:

— Այդ անիծեալ դպրոցին մասին է, նորէն, զիտեմ,  
և այս անգամ քո՛ւ անունն ալ խառնած են, ըստւ: Է՞ն,  
ես այդպէս ալ զիտէի: Դժո՛խք է, դժոխք...

Սողոմոն ոգեւորուեցաւ:

— Բայց դժոխքին մէջ ալ այսքան չեն սաեր, ու չեն  
զրպարտեր, Նո՛ւնիկ...

— Ստոշը կը ստէ, սիրելիս...

Սողոմոն աւելի գրգռուեցաւ և երրորդ անգամ ըլլա-  
լով զետին շպրտած թերթը ձեռքը առաւ: Զնայած որ քիչ  
առաջ վճռած էր գէթ Նունիկէն թաքցնել իր կարդացածը,  
բայց հիմա նոյնիսկ կրքու բաւականութիւն կը զգար թըլ-  
թակցութիւնը Նունիկի կարդալու ծայրէ ծայր:

«Յաւով կ'արձանագրենք հոս — իր կամքէն անկախ  
բարձր և որոշ կը կարդար Սողոմոն — թէ գաղութիս եր-  
քիմի խաղաղիկ կեանքը կարգ մը վատահամբաւ սինկքոր-  
ներու շնորհիւ խոռված է, ալեկոծեալ ծովու մը նման: Գա-  
ղութին և ազգին պատիւթին ու անդորրին սպառնացող այդ  
ափ մը փողոցային ստահակները վերջերս զտած էին իրենց

արժանաւոր պետը, յանձին աւազակապետի մը, որուն ա-  
նունը թերեւս յարգելի ընթերցողը կռահեց արդէն: Այո՛,  
յարգելի ընթերցողս սխալած չէ իր կոտամումին մէջ: Մեր  
խօսքն ալ այդ մակաբոյծին, Սողոմոն Ներկարարեան կոչ-  
ուած մարդ-հրէշին մասին է, որուն գոյութիւն չունեցող  
խղճին վրայ կը ծանրանայ մէկ միլիոն եղերաբախտ հարա-  
զատներուն արիւնը:

«Տարիէ մը ի վեր այդ աննկարագիր արարածը գա-  
ղութս իրար խառնեց, եղբայրը եղբօր գէմ հանելով, ըն-  
տանեկան տաքուկ բոյներ կործանելով, ստելով, զրպար-  
տելով, դաւաճանելով, չորթելով, ուտելով: Արդարեւ, իս-  
կական առաւ-փախաւ մը, որ մեր հէտ ազգին անունը հիւ-  
րասէր ու մեծահոգի օտարներուն առջեւ զարշահոտութեան  
մէջ ձգելէ չսոսկաց:

«Մեր ձեռքին տակ վաւերական փաստեր կան, որ այդ  
աւազակապետը օտար մեծահոգի վաճառականուհիի մը վստա-  
հութիւնը չարաչար գործածելով, տասը հազար ֆրանքի  
ապրանք քաշած է անոր վաճառատունէն և հիմա անպատ-  
կառօրէն ձեռքը պատը քսելով կուրրանայ: Եւ մտածել թէ  
յարգելի վաճառականուհին այդ տասը հազար ֆրանքի ապ-  
րանքը վստահած է իրէն միայն և միայն դիմացինը հայ  
սեպելով: Կրնա՛ք երեւակայել ազգիս խայտառակութիւնը:  
Մնաց որ յարգելի տիկինը, արդէն յուսահատ, զատարան  
դիմած է:

«Բայց ասկէ զարնուրելին ալ կայ: Նոյն պարոնը, հա-  
սարակ գողի մը նման, ծանօթ ազգայինի մը տունը հիւ-  
րասիրուած պահուն, ե՛լ երթանք ըստած է և զրպանը դրած  
տանակիրոջ ոսկի ժամացոյցն ու ոսկի շղթան: Սուանց հոդ  
ընելու թէ իր գողութիւնը երեւան կ'ելլէ օր մը, անպատ-  
կառօրէն գողցուած ժամացոյցն ու շղթան ծանօթի մը ծա-  
խած և զրպան գանձելով նոյն օրն և եթ անխոստովանելի  
վայրերու մէջ ծախսած է, չմոռնալով պարկեշտ այրի կին  
մըն ալ մոլորեցնել ճամբան: Եւ տակուին մտածել թէ այդ  
անբարոյական հրէշը ամուսնացած ալ է, կին և զաւակներ  
ունի: Ինձի հաւասարեցին թէ իր դժբախտ կինը, չկրնալով

հանդուրժել իր կովելլաս ամուսինին այլանդակութիւնները, զիմած է ուր որ անկ է, գէթ ապահարզան մը ձեռք ձգելու համար, իցի՛ւ թէ յաջողէր: Բայց ինչո՞ւ զարմանալ քանի որ այդ սինլքորը իրական ղեկավարներէն և ի՛ր իսկ բառով տեսաբանն է համբաւաւոր ազատ-սէրեաններուն:

«Ինչո՞ւ զարմանալ որ ան հիւրասէր ազգային մը կողոպտած է, երբ անիկա իր ետեւն ունի ամբողջ ազգի մը և մանուկ պետութեան մը կողապուտին վաւերական պատմութիւնը: Կամ ինչո՞ւ զարմանալ որ զաղութս իրար կը խառնէ և սուրի ու արիւնի շնական խօսքեր ու գործքեր կ'ընէ, երբ մէկ միլիոն ազգակիցներու ջարդը պարտադրելէ և իրազործելէ ետքը, հիմա ալ նոտեր ներբողներ կը շարադրէ, ի՛ր իսկ սորագրութեամբ, կարգ մը ստորին թերթուկներու մէջ:

«Արդ, ասանկ բարի ծաղիկ մը նաև... ուսուցիչ ալ է, այն ալ զաղութիս նշանաւոր դպրոցին մէջ: Ստկայն լաւ է ուշ քան երեք: Հիմա, որ անգամ մը աւազակապետին դիմակը վար առնուած է, զաղութիս պատուտուր տարրերու վրդովմունքը ա՛լ չափ ու սահման չունի: Ալ ոչ ոք կրնայ հանդուրժել որպէսզի առաւ փախաւին մէկը ամբողջ զաղութի մը և ազգի մը քթին ինդայ և ամէն ոճիր ու սրիկայութիւն գործելէ ետք տակաւին ուսուցչական նուիրական ասպարէզն ալ պղծէ իր անարդ գոյսութեամբը և ազգին դրամներէն արքայական ոռծիկ ստանայ: Այս ալ ըսենք թէ զինքը ուսուցչութեան կանչողները պարզասիրտ, միամիտ մարդիկ եղած են և, ըստ իս, բնա՛ւ յանցաւոր չեն: Բաւակա՞ն է որ անոնք կը զղջան հիմա: Մնաց որ, մէջտեղը սպառնալիքներու, արիւնի, զաւի, մատնութեան և քսութեան ահագին պատմութիւններ կան, զորս. առ այժմ մեր կարքէն անկախ պատճառներով՝ յարմար կը զատենք վերապահել: Միայն կը շատանանք յիշատակել թէ մեր հերուը օտար պետութեան մը հաշուոյն գործող լրտես մըն է:

«Արդ, մեր ազգային պարտականութիւնը կը սեպենք, վերջին անգամ ըլլալով հրապարակով ալ յայտարարել Սողոմոն Ներկարեանի (իմա՛ զառնամորթ գայլին) թէ՝ ա՛լ

հատած է գաղութիս համբերութիւնը և թէ բաւակա՞ն է, որքան ան քէն ու որոմ ցանեց մեր անմեղունակ մանկիկներու պաշտելի հոգիներուն մէջ: Գաղութիս միահամուռ վճիռն է արտաքսել զայն դպրոցէն և ուսուցչական ասպարէզէն, որուն համար ազգիս մէջ արժանաւորները չեն պակսիր անշուշտ: Գաղութիս անդառնալի վճիռն է նաև վըռնտել զայն գաղութէս և գրկել զայն ազգին անդամակցութենէն:

«Ի դէպ, Սողոմոն Ներկարեան կոչուած մարդուկը գրիչ ալ կը շարժէ եղեր, մեծ գրագէտի հովեր կ'առնէ. ինչպէս նաև աս ու ան կը մոլորեցնէ ըսելով թէ ինք տարիներու մանկավարժ և նոյնիսկ համալսարանական է: Նենդաւո՞ր ու աննախընթաց կեղծիք: Ողորմելի գրչակին և իր «գրականութեանը» կուտ մը տուող չկայ հոս, վասնզի ամէնքն ալ գիտեն թէ ան, գող՝ կեանքի մէջ, բանազող մըն է գրականութեան մէջ: Իսկ ինչ կը վերաբերի անոր համալսարանական մը ըլլալուն, այսու կը յայտարարենք բոլոր միամիտներուն (եթէ կան, անշուշտ), թէ պարոնը այդ պիտակը ձեռք բերած է անխոստովաննելի միջոցներով և կեղծթուղթերով և վկայականներով:

«Առ այժմ այսքան:

### ՃՇՄԱՐՏԱԽՈՒ

«Յ. Գ.— Երկառզա դեռ չծրարած լուր տուին ինծի, խիստ արժանահաւատ աղբիւրէ մը, թէ զպրոցիս յարգոյ Հոգաբարձութիւնը, ընդառաջ երթալով գաղութիս միահամուռ և միաձայն բողոքին, որոշած է մէկ անգամ ընդմիշտ վտարել անարժան ուսուցիչը և զաղութիս անդորրութեան և փրկութեան գործը իր նախկին բնականոն, ամուր հիմերու վրայ գնել:

«Կը անզեկանամ նոյնպէս թէ Հոգաբարձութեան նոյն նիստին մէջ, խնամեալ հաշմատութենէ մը ետք պարզուած է, որ Սողոմոն Ներկարեան կոչեցեալը, մոլորեցնելով Հոգաբարձութեան գանձապահ ազնիւ և ծանօթ պատմուաւոր ազգային վաճառական պ. Վարդերես Մարուք-

ևանը, սուտ ու սխալ հաշիւներ ներկայացնելով՝ կողոպտած  
է դպրոցին և եկեղեցին գանձը:

«Կը սպասուին զգայացունց մերկացումներ և ազգային  
ժողովրդական բուռն սպոթկումներ, որոնց ժամին անշուշտ  
իր ժամանակին կը տեղեկացնեմ:

11.

— Հիմա ի՞նչ պիտի ընենք, Նունիկ:

— Պիտի թքնես...

Ո՛չ, Սոզոմոն առնուադն պիտի ստուգէր թղթակցու-  
թեան հեղինակին ո՛վ ըլլալը:

— Ասոնք ինծի բարոյապէս մեռցնել կ'ուղեն, դուն  
չե՛ս զիտեր, Նո՛ւնիկ...

Նունիկ զիտէր, բայց անօգուտ և անպատիւ բան կը  
համարէր պայքարի մտնել բարոյական ոչնչութիւններու  
հետ, որոնք անուն անգամ չունին: Արժէ՞ ցեխոսուիլ...

Ո՛չ, Սոզոմոն գործը հանրային դատաստանին պիտի  
յանձնէր:

— Է՞ն, քու հանրային դատաստանը, հատիկ հատիկ  
կը հեգնէր Նունիկ:

— Ինչպէ՞ս... այսքան հնարարեան մշակոյթի, յե-  
ղափոխական այսքան հարուստ անցեալի և ժառանգու-  
թեան, ժամուլի, գրականութեան, մտաւորականութեան,  
երիտասարդութեան և հազար և մէկ հոդեւոր բարոյական  
գանձերու տէր մեր ժաղովուրդին հանրային դատաստանը  
կը պակսի, Նո՛ւնիկ: Ո՛չ, կը սխալիս...

Նունիկ լուռ էր:

— Պատասխանէ՛, Նո՛ւնիկ, պատասխանէ՛...

Թէե Նունիկ կը տանջուէր ինքզինքն ու Սոզոմոնը  
հանդստացնել չկարենալուն համար, բայց տեսակ մը կիր-  
քով ցոյց կու տար վարը, զետին շպրտուած թերթն ու  
թղթակցութիւնը և կ'ըսէր.

— Ահա՛, ահա՛ պատասխանէ՛ և պատկերը քու հանրայ-  
ին դատաստանին...

Ու կը զզչար իսկայն՝ ինքզինքն ու Սոզոմոնը տան-  
չելուն համար:

Գիշերը կը սպառէր, կը լուսնար և նունիկ ու Սոզո-  
մոն աթոռէ աթոռ կը փոխազրուէին, կ'երթեւեկէին սեն-  
հակին լայնքով ու երկայնքով, մահճակալի այս ու այն  
ծայրին կը ձգէին ինքզինքնին՝ փորձելով հանդստանալ,  
բայց, կարիծէ խայթուածի պէս, ընդուած վեր կը թռչէին  
և՝ օդի ու ազատութեան ծարաւի՝ փոխն ի փոխ կը հառա-  
չէին:

Ու կը թուէր թէ հառաչանքը միակ հնարաւոր բաւա-  
րութիւնն էր:

Կրկին ու կրկին, հակառակ իրենց կամքին, կ'անզրա-  
դառնային թղթակցութեան:

— Պիտի պահանջնեմ, առաջին հերթին, որպէսզի խըմ-  
բագրութիւնը յայտնէ թղթակցի իսկական պնունը, Նու-  
նիկ:

— Ի զո՞ւր է, չի յայտներ, իրաւո՞ւնքս է կ'ըսէ և  
չի յայտներ:

— Լու, այն ատեն կը պահանջնեմ որպէսզի այդ ան-  
լուր զրպարատթիւններէն զէր մեկը տպացուցանէ, ևս  
պատրաստ եմ ամենախիստ պատժին ենթարկուիլ, եթէ ա-  
պացուցանէ զէր մեկը... Պատրաստ եմ զատուելու ո՛եւէ դա-  
տարանի առջև, կը հասկնա՞ս, Նո՛ւնիկ...

Նունիկ յուսահատօրէն կը ծիծալէր:

— Ի զո՞ւր է, սիրելիս, կը պատասխանէր ի վերջոյ  
անհուն արածութեամբ, բայց համոզիչ եղանակով: Ի զո՞ւր  
է: Կ'ուզե՞ս խմբագրութեան պատասխանը անդիր կարդամ  
քեզի:

“Նամակատուփ. Սոզոմոն ներկարարեանին. — Խմբա-  
գրութիւնն հրապարակաւ կը յայտարարէ թէ ձեզ նման  
վարկաբեկուած արարածի մը հետ դատ ու զատաստանի նըս-  
տիլը իր արժանապտուութիւնէն միանզամաժայն վա՛ր կը  
համարէ: Արդարեւ խմբագրութիւնն կը զարմանայ ձեր ա-  
պերասան յանգինութեան վրայ: Պիտնալով հանդերձ ձեր  
յետին զիտումները, կը հարցնենք, ի՞նչ հանրային դա-

տաստանի մասին կը խորհիք, երբ ամենայն հնարաւոր մանրամասնութեամբ և բոլոր ծանրակշիռ, վաւերական փաստերով մեր թերթին մէջ ներկայացուած էք արդէն այնպէս, ինչպէս կաք: Ի՞նչ, մեր թերթին հանրային օրկան մը ըլլա՞լն ալ պիտի ուղէիք ուրանալ և մեր հանրային բարոյական ամէնէն ազգու դատարանէ՞ն ալ կ'ուղէիք ճողոպրիլ: Յուսա՞նք թէ մեր այս ակամայ պատասխանով կը զգաստանաք վերջապէս և ձեր նմաններու ախտաւոր զոյթեամբ այլեւս չէք ապականեր մեր հանրային մթնութրտը...»

Մինչ նունիկ հառաչելով կը լոէր, Սողոմոն ատամնեսը կը կէրտէր, այս ու այն անկիւնը կ'իյնար, կարծես կը համոզուէր, կարծես իրաւունք կու տար նունիկին, բայց իսկոյն հեռաւոր յոյսի հիւանդ մէկ շողով կը լուսաւորուէր...

Հիւանդ լոյսը կրկին կ'անհետանար սակայն:

Ա'խ, մէյ մը ստուգէր թղթակցի ով ըլլալը:

Անգամ մը շեշտակի, ուղիղ նայէր անոր աչքերուն մէջ, ըսէր.

— Չե՞ս ամէնար...

Անգամ մը թքնէր:

## 12.

Արեւի պլտիկ ու թշուառ ճառագայթ մը լուսամուտէն ներս ինկած էր, երբ Սողոմոն հազ հաղիւ ուշքի եկաւու, հակառակ նունիկի յորդորներուն, օրօրուող քայլերով դպրոց գնաց: Ուսուցչարանի փակ դրան առջև պահ մը կանգ առաւ շունչ առնելու: Շտապած չէր, ինչո՞ւ կը հետար: Այնքան ալ ցուրտ չէր, ինչո՞ւ կը դողար:

— Արդիօք բոլոր ուսուցիչներն ալ գիտե՞ն: Իսկ աշակերանե՞րը... կը խորհիք ու դրան առջև կանգնած այն տպաւորութիւնը կը ձգէր թէ դիտմամբ կացած է հոն ու կը լրտեսէ:

— Սո՞ւտ է:

— Ճի՞շտ է:

— Կ'ըսեմ սո՞ւտ է, մի հաւատաք:

— Իսկ ես ալ կ'ըսեմ ճի՞շտ է, հաւատացէ՞ք: Այդքան սուաչի չի կրնար գրուիլ, եղբա՛յր...

կը լսէր Սողոմոն ներսէն աշխարհագրութեան ուսուցիչի և բնական գիտութիւններ աւանդով երիտասարդ ուսուցչուհիի որոշ ձայները:

Ի՞նչ սուտի և ճիշտի մասին կը խօսին, մտածեց Սողոմոն և, շունչը բռնած, սպասեց տակաւին:

— Ճի՞շտ է, և կը տեսնէք շուտով, ո՞վ գիտէ, գուցէ այսօ՞ր իսկ ապացուցուի, հանդիսաւոր վստահութեամբ ըստ աշխարհագրութեան ուսուցիչը և աւելցուց:

— Ապացոյցներէն մէկն ալ այն է, որ այսօր դպրոց չեկաւ...

Ու քմծիծաղ տալով

— Հարկա՞ւ, պէտք եղածէն աւելի խելօք է ձեր պարոն Սողոմոնը, դպրոց չի գար, որպէսզի ետքը կարենայ ըսել թէ ի՞նք հրաժարած է և ոչ թէ վոնտած են զինքը...»

Սողոմոն այլեւս կասկած չունէր: Առանց ինքզինքին հայիւ տալու, աղմուկով ներս մտաւ, ողջունեց ուսուցչուն էին և հին օրերու պէս հպարտ, յաղթ ու տիրական՝ ցցուեցաւ սափրիչային գեղեցկութեամբ օժտուած աշխարհագրութեան ուսուցիչին առջեւ:

— Ի՞նչ կ'ըսէիք վայրկեան մը առաջ, իմ բացակայութեանս, ի՞մ մասին, հարցուց ըստ երեւոյթին սառն, բայց իսկոյն զգաց որ վայրկեան մըն ալ և ահա հին օրերու պէս պիտի պոռթկայ անզուսպ ու արդար:

— Յարգանքնե՞րս, միւսիւ Սողոմոն, ի՞նչպէս, ինձ հե՞տ էք... այո՛, ձեր մասին կը խօսէինք, ինչո՞ւ ուշացաք, կ'ըսէինք, միւսիւ Սողոմոն յանկարծ հիւանդացած չըլլայ, կ'ըսէինք, անհանդիստ էինք, դժբախտութիւն մը պատահած չըլլայ, կ'ըսէինք...

Արագ արագ և փորձ վրայ բերաւ աշխարհագրութեան ուսուցիչը դէմքին անսահմանք քննանք բերելով և խոնարհարար անվերջ ժպտելով:

Ուսուցչունին զգուանքով վեր ցատկեց տեղէն և լուսամուտէն դուրս նայեցաւ:

— Դուք... դուք ստախօ'ս էք և, աւելի՛ վատը՝ վախուկո՛տ...

Ճայթեց Սողոմոն և իր դասին անցաւ: Արդարեւ, ուշացեր էր:

Առաջին դասը այսպէս կամ այնպէս վերջացաւ:

Երկրորդ դասը հազիւ սկսուած, Սողոմոն փողոցէ՞ն թէ դպրոցի պարտէզէն հեռաւոր աղմուկ մը լսեց: Կարծեց օտար, նորագիր զինուորներ էին որ հայրենասիրական ուրախ, գոռ երգերով կ'անցնին փողոցներէն:

Սողոմոն խուլ մտքով մը բռնուեցաւ:

— Ա՛խ, ինչո՞ւ հայրենի երկրին մէջ չէր...

Աղմուկը սակայն աւելի մօտեցաւ: Լուսամուտէն անդին Սողոմոն կարծես ծանօթ դէմքեր տեսաւ, որոնք կ'անցնէին արդար բողոքով ու սրբազան զայրոյթով լեցուած այն քաջերու նման, որոնց Հայրենիքի վտանգի և պաշտպանութեան սրբազան կոչը կեանքի և մահուան գերագոյն պայքարին կը կանչէ...

Դժուար էր հասկնալ: Ամէն պարտգայի տակ դասը պէտք էր շարունակել: Սակայն ի զո՞ւր Սողոմոն կը փորձէր զգաստութեան կանչել աշակերտները, որոնցմէ մէկ քանիսը որոշապէս տժգունած կը թուէին, իսկ ուրիշներ կրակ առած հետաքրքրութեամբ շարունակ ոտքի կը թռչէին, անհանգիստ ու բռնկուած:

— Մենծ աղբարդ էր, միւսիւ Մելքոնը, ես տեսա՛յ, ըստ աշակերտներէն մէկը իր քովը նստած ընկերոջ:

— Ծո՛, անիկա հայրիկդ էր, Վարդերես աղան, շշնչաց մէկ ուրիշը:

Շաշ ու շառաչով միւս դասարաններու դուռները կը բացուէին, ուսուցիչները ուսուցչարանին և աշակերտները դասարաններուն մէջ կ'աղմէէին, իսկ դպրոցի պարտէզին մէջ թառնիճաղանձ ամբոխ մը կը մոնչէր...

### 13.

Իրիկունը, մինչեւ ուշ գիշեր, մինչեւ լուսաբաց, Սողոմոնի ուղեղը, տենդի ու տապի մէջ տապկուած՝ չէր կը նար գէթ գլխաւոր գիծերով ամփոփել օրուան անցուդարձը:

... Դրացի փրոֆէսօրը պատկից սենեակին մէջ բարձրածայն կը կարդար ու Սողոմոնի կը թուէր թէ այդ Մելքոն Արեւշատեանն է, որ ամբոխին գլուխն անցած դպրոցի պարտէզին մէջ միթինկ կը գումարէ, հրաշունչ ձառ կը խօսի, դպրոցի և եկեղեցիի, ազգի և հայրենիքի մասին կ'աւաղէ և կը յորդորէ փրկել աղատել ազգը և մանսւկ սերունդը Սողոմոնի նման ազգապիղծ հերոսներէ...

«Անկցի՛, կեցցէ՛»: Ո՞վ: «Սողոմոն: Մելքոն»: Ինչո՞ւ:

... Սուրիկ ձայնը ձգեց նորէն սուր ու երկարատեւ: «Պարո՛ն Սողոմոն, պարո՛ն Սողոմոն, պարո՛ն Սողոմոն...»

Ասոնք բոլորը մեծ ու պտտիկ աշակերտներն են ու աշակերտունիները, որոնք կախուած են իր հնամաշ վերակուի փէշերէն, կու լան, կը ճշան, բաժնուիլ չեն ուղեր իւրենց սիրած ուսուցիչն...

... Անլուր, գոեհիկ հայնոյանքներ կը նետուէին, կը ձայթէին իր գլխուն, օրը ցերեկով, ուսուցչարանին, դըպրոցի բակին ու պարտէզին, փողոցին մէջ... Հայեր չէին: Անկարելի բան է: Հայեր չէին: Օտարներ, վարձկաններ: Անկասկած... լա՛ւ, «Նորին Մեծութի՞ւն»ը ինչ գործ ու նէր... վկա՛յ:

Մելքոնի և ամբոխի հետ, կանգնած է շիլ հոգաբարձուն, շաբաթներու կեղտ պահող մատը զէպի Սողոմոնը ցըցած, փրփուրը բերնին, շիլ աչքը լարած՝ կը պոռպոայ.

— Միայն իմ դրամս եթէ ուտէր, ոչինչ: Ատ ուսուցիչ չըլլալիքը եկեղեցիի աղքատաց պնակէն ալ գողցաւ կերաւ... Զհաւատացողին ճակատը կը չափեմ: Ատանկները կը հրաւիրեմ գալ վաճառատանս տոմարները նայիլ: Վարդերես աղան նոր մարդ չէ այս դործերուն մէջ: Անոր ճակատը

բաց է։ Վարդերեսին պատուաւոր վաճառական ըլլալը ամէնքդ աւ գիտէք, փա՛ռք Աստուծոյ։

... Այո՛, այո՛, ոստիկաններ եկան, ամբոխը ցրուեցին։ Դպրոցը փակեցին։ Դուռները կնքեցին։ Եւ փառք, յաւիտեանս ամէն...

— Փա՛ռք Աստուծոյ, մեքենաբար կը կրկնէր Սողոմոն  
ու կը հառաչէր։

Սողոմոնի ծանր հառաջանքը Նունիկի ականջը կ'իյանար և ան, կիսաքուն, ընդուած վեր կը թռչէր։ այլայլած ու երկար ատեն կը կարծէր թէ խելագար տանտիկինն է եկեր նորէն, կը պոռպոայ և կը պահանջէ սենեակը անժիշտէս իսկ դատարկել...

— Հեռանա՛նք, հեռանա՞նք այս դժոխքէն, կը մրմզէր Նունիկ վերջնապէս յուսահատ։

Սողոմոն, Նունիկին իրական սարսափ աղդելու չափ,  
դառնօրէն կը քրքջար։

— Ո՞ւր հեռանանք, Նունիկ, ո՞ւր...

Նունիկ պատասխան չէր գտներ։

(ՊԵՐՉ)

ՀՀ Ազգային գրադարան



NL0123849

# “ՄԱՍԻՄ” ԳՐԱՏԱՆ ՀՐԱՏԱՐԱԿՈՒԹԻՒՆՆԵՐԸ

	Լեկ
1. Ասուր-Նազիր-Աբալ	Գ. ՄԵՀԵԱՆ 10
2. Մեծապատի Մուրացկանները	Զ. ՊԱՐՈՆԵԱՆ 30
3. “Մասիս”, Տարեգիրք Ա. Տարի	Ա. ՍԵՒԱՆ 100
4. Թանկագին Համբոյր (Կակերգ. 1 արար)	10
5. Գիրուկ Մարդուն Հանոյինները	ՈՒ. ՃՈՆՍՅՆ 15
6. Հռոմի Պապին Զաւակները,	Մ. ԶԷՎԱՔՕ 150
7. Գուշակը (Երգիծավկեպ)	ՄԹ. ՔՈՍԹՈՎ 20
8. “Մասիս”, Տարեգիրք Բ. Տարի	Ա. ՍԵՒԱՆ 100
9. Հրացեններու Պալատը	Մ. ԶԷՎԱՔՕ 150
10. Խելագար Հայուհին	ՏՈՒԹ. ՃԵԼԱԼԵԱՆ 65
11. Մուսա Լերան 40 Օրերը Ա. Բ. Հատու ՖԻ. ՎԵՐՖԵԼ 400	
12. Ռակսարենի Ասպետը	Մ. ԶԷՎԱՔՕ 150
13. Հին Հայ Բանաստեղծութիւնը	Գ. ԳԵՂԱՐՔՈՒՆԻ 30
14. Հայ Եղեռնը	Մ. ՆԵՑԻՄ 20
15. Թարգան	ԷՏԿԱՐ ՌԱԹՍ ՊԱՐՈՋԻ 50
16. Յոյն Լրես. Գործունեութիւնը	ՊՈՂՍՈՎ ՄԵԶ 20
17. Վիտօֆ	ԱՐԹԻՒՐ ՊԵՐՆԵՏ 100
18. Վարդան Մամիկոնեան	ՕՆ. ՄԵԽԻԹԱՐԵԱՆ 20
19. Սիրոյ մը վեպը	ՕՆ. ՄԵԽԻԹԱՐԵԱՆ 10
20. Նահանջ	ՕՆ. ՄԵԽԻԹԱՐԵԱՆ 10
21. Արամ Մանաւեան	ՕՆ. ՄԵԽԻԹԱՐԵԱՆ 12
22. Կարմիր Յորձանին	ՕՆ. ՄԵԽԻԹԱՐԵԱՆ 50
23. Պաղտասար Աղբար (Կակերգ. 3 արար) Յ. ՊԱՐՈՆԵԱՆ 35	
24. Ազգային Բարեւար	Ե. ՕՏԵԱՆ 15
25. Պելֆեկոր	ԱՐԹԻՒՐ ՊԵՐՆԵՏ 80
26. Ընկեր Շահագար (Երգիծ. վեպ) Ն. ՊԵՇԻԿԹԱՇՆԵԱՆ 10	
27. Արիւնի Ճանապարհին	Կ. ԽԲԱՅԵԱՆ 40
28. Արիւնարբու Կինը (Ա. - Բ. հատոր) ԱՐԹԻՒՐ ՊԵՐՆԵՏ 80	
29. Ազգիս Բարեւարները (Զաւետ 1 արար) Ա. ԱՐՓԻԱՐԵԱՆ 15	
30. Ճեղքիքաց Նորածինը	Ե. ՕՏԵԱՆ 10
31. Հայոց դերը մարդկ. և ակոյրի մեջ (ալիկ.) ՏԱՏՈՄԵԱՆՑ 70	
32. Առօրեայ	ՕՆ. ՄԵԽԻԹԱՐԵԱՆ 20

ԱՐՏԱՍԱՀԱՄԱՆ 5 ֆր. ֆր.